

清

史

稿

清史稿

列傳七十七

楊名時

黃叔琳

子 聖賢

方苞

王蘭生

胡煦

魏廷珍

任 國校

蔡世遠

沈近思

雷鉞

楊名時字寶實江南江陰人康熙三十年進士改庶吉士李光地爲考官深器之從受經學散館授檢討四十一年督順天學政用光地薦也尋遷侍讀四十二年上西巡肥鄉武生李正朝病狂衝突儀仗光地時爲直隸巡撫請罪正朝因劾名時上斥名時督學有意棄富錄貧不問學業文字但不受賄屬從寬恕省四十四年任滿命河工効力旋連遭父母喪以憂歸五十一年服除候補五十二年命直南書房名時不投牒吏部因不得補官上特命充陝西考官五十六年授直隸巡道時沿明制直隸不設兩司以巡道任按察使事政劇吏爲姦

名時革宿弊殆盡五十八年遷貴州布政使五十九年擢雲南巡撫師征西藏
留駐雲南名時爲營館舍明約束無敢叫囂名時疏言雲南兵糧歲需十四萬
九千餘石俱就近支放兵多米少諸州縣例四年折徵一次請改每年給本色
三季折色一季部議如所請行雍正元年名時奏請安世宗諭曰爾向日居官
有聲茲當加勉莫移初志尋疏言雲南巡撫一切規禮臣一無所取惟鹽規五
萬二千兩除留充恤竈修井諸用餘四萬六千兩累年供應在藏官兵軍需賞
賚撥補銀廠缺課及公私所用皆取於此藏兵撤後請仍留臣署若干餘悉充
公用上諭曰督撫羨餘豈可限以規則取所當取用所當用全在爾等揆情度
理而行無煩章奏也名時迭疏請調劑鹽井改行社倉皆下部議行雲南自亂
後田賦淆亂往往戶絕田去而丁未除至有一人當數十丁者累代相仍名曰
子孫丁名時疏請照直隸例將通省丁額攤入田糧完納雲南舊例地方應辦
事皆取諸民間謂之公件胥役科歛指一派十重爲民累名時議核實州縣需
款酌定數目徵收不得再有加派檄行所屬諸州縣核數開報三年擢兵部尙

書改授雲貴總督仍管巡撫事時上令諸督撫常事疏題要事摺奏名時洩密摺上令悉用題本名時乞遇事仍得摺奏許之四年轉吏部尚書仍以總督管巡撫名時具題本誤將密諭載入上嚴責命解任以朱綱代爲巡撫未至仍令名時暫署俄綱上官劾名時在任七載徇隱廢弛庫帑倉穀借欠虧空上命名時自陳綱代名時奏謝罪上責其巧詐諭總督鄂爾泰嚴訊名時自承沾名邀譽斷不敢巧詐讞上部議以名時始終掩護朦朧引咎無人臣事君禮坐挾詐欺公當斬上命寬免復遣侍郎黃炳會綱按治炳等欲刑訊鄂爾泰持不可乃坐名時得鹽規八萬除捐補銀廠缺課應追五萬八千餘兩上令名時留雲南待後命高祖即位召詣京師乾隆元年名時至賜禮部尚書銜兼領國子監祭酒兼直上書房南書房名時以前在雲南令諸州縣核實需款定數徵收去公件之弊事未竟而去奏請下督撫勘定總督尹繼善巡撫張允隨奏請以額編條粗重輕與原定公件多寡兩相比並就中攤減下部議行視未定議前取諸民者去十之七雲南民困以蘇苗疆用兵久名時疏言御夷之道貴在羈縻未

有怨毒猜嫌而能長久寄貼者貴州境內多與苗疆相接生苗在南漢人在北而熟苗居中受雇直爲漢人傭相安已久生苗所居深山密箐有熟苗爲之限常聲內地兵威以懾之故亦罔敢窺伺自議開拓苗疆生苗界上常屯官兵干戈相尋而生苗始不安其所至熟苗無事則供力役用兵則爲嚮導軍民待之若奴隸生苗疾之若寇讎官兵勝則生苗乘間抄殺以洩忿官兵敗又或屠戮以冒功由是熟苗怨恨反結生苗爲亂如台拱本在化外有司迎合要功輒謂苗民獻地上官不察竟議駐師遂使生苗煽亂屢陷官兵蹂躪內地間有就撫熟苗又爲武臣殘殺賣其妻女是以賊志益堅人懷必死爲今日計惟有棄苗疆而不取撤重兵還駐內地要害築城俾民有可依兵有可守來則禦之去則舍之明懸賞格有能擒首惡及率衆歸順者給與土官世襲分管其地更加意撫綏熟苗使勿爲生苗所劫掠官兵所侵陵庶有俛首向化之日不然臣恐兵端不能遽息也二年卒贈太子太傅賜祭葬諡文定

黃叔琳字崑圃順天大興縣人康熙三十年一甲三名進士授編修累遷侍講

丁父憂服除起原官遷鴻臚寺少卿五遷刑部侍郎雍正元年調吏部命偕兩淮鹽政謝賜履赴湖廣與總督楊宗仁議鹽價革除陋規從所請疏言各省支撥兵糧布政使糧道爲政先期請託方撥近營否則撥遠州加運費民既重累輸輓兵亦苦待餵請敕督撫察兵數先撥本州縣衛所不敷於附近州縣撥運下部議行旋授浙江巡撫時御史錢廷獻請濬浙江東西湖蓄水灌田命叔琳會總督總保勘議叔琳等奏言西湖居會城西周三十餘里南北山泉入湖處舊皆設閘以阻浮沙水得暢流又有東湖爲之停蓄湖水分出上下塘農田資以灌溉自閘廢土淤民占爲田築埂圍蕩栽荷蓄魚請照舊址清釐去埂建閘濬城內河道並疏治上塘各支港及自會城至江南吳江界運河港汊壩堰部議從之叔琳疏薦人才有廷臣嘗言於上者上疑叔琳請託先容諭戒鄭重會有言叔琳赴湖廣時得鹽商賅俾充總商及爲巡撫庇海南陳氏僕其弟御史叔璣巡視臺灣過杭州僕聞於市叔琳皆以罪商有死者商爲罷市上命解叔琳任遣侍郎李周望與將軍安泰分案按治安泰等奏叔琳以陳氏僕與商爭

嚴逮商杖斃事實無與叔礲事亦未嘗罷市周望等奏叔琳貸金鹽商非行賄
上命毋窮究三年命赴海塘効力乾隆元年授山東按察使疏言舊例州縣命
案印官公出由隣封相驗嗣廣西巡撫金鉞奏請改委佐雜資緣賄屬難成信
讞又言審案舊有定限逾限議處嗣河東總督田文鏡題定分立解府州司院
限期雖意在清釐適啟通融挪改之弊請皆仍舊爲便從之二年遷布政使四
年丁母憂服除授詹事以在山東誤揭屬吏諱盜奪官叔琳登第甫二十六
年重遇登第歲命給侍郎銜二十一年卒年八十三叔琳富藏書與方苞友苞
治諸經叔琳皆與商榷子登賢字筠盟乾隆元年進士授戶部主事累遷左副
都御史督山東學政康熙間叔琳來督學立三賢祠祀胡瑗孫復石介以式諸
士後六十年登賢繼之訓士遵才皆循叔琳訓四十九年卒

方苞字靈皋江南桐城人父仲舒寄籍上元善爲詩苞其次子也篤學修內行
治古文自爲諸生已有聲於時康熙三十八年舉人四十五年會試中式將應
殿試聞母病歸侍五十年副都御史趙申喬劾編修戴名世所著南山集子遺

錄有悖逆語辭連苞族祖孝標名世與苞同縣亦工爲古文苞爲序其集並述
下獄五十二年獄成名世坐斬孝標已前死戍其子登嶧等苞及諸與是獄有
干連者皆免罪入旗聖祖夙知苞文學大學士李光地亦薦苞乃召苞直南書
房未幾改直蒙養齋編校御製樂律算法諸書六十一年命充武英殿修書總
裁世宗即位赦苞及其族人入旗者歸原籍雍正二年苞乞歸里葬母三年還
京師入直如故居數年特授左中允三遷內閣學士苞以足疾辭上命專領修
書不必詣內閣治事尋命教習庶吉士充一統志總裁皇清文穎副總裁乾隆
元年充三禮義疏副總裁命再直南書房擢禮部侍郎仍以足疾辭上留之命
免隨班行走復命教習庶吉士堅請解侍郎任許之仍以原銜食俸苞初蒙聖
祖恩宥舊欲以學術見諸政事光地及左都御史徐元夢雅重苞苞見朝政得
失有所論列既命專事編輯終聖祖朝未嘗授以官世宗赦出旗召入對慰愈
之並曰先帝執法朕原情汝老學當知此義乃特除清要馴致通顯苞屢上疏
言事嘗論常平倉穀例定存七糶三南省卑濕存糶多寡應因地制宜不必固

成例年饑米貴有司請於大吏定植開糶未奉檄不敢擅自後各州縣遇穀貴應即令定值開糶仍詳報大吏穀存倉有鼠耗盤量有折減移動有運費糶糶守局有人工食用春糶值有餘即留充諸費廉能之吏遇秋糶值賤得穀較多應令詳明別貯備歉歲發賑下部議行又言民生日廣請禁燒酒禁種烟草禁米穀出洋並議令佐貳官督民樹畜士紳相度溶水道又請矯積習興人才謂上當以時延見廷臣別邪正示好惡內九卿外督撫深信其忠誠無私意者命各舉所知先試以事破瞻徇繩臧私厚俸而久任著聲績者賜金帛進爵秩尤以六部各有其職必慎簡卿貳使訓厲其僚屬以時進退之則中材咸自矜奮乾隆初疏謂救荒宜豫夏末秋初水旱豐歉十已見八九舊例報災必待八九月後災民朝不待夕上奏得旨動經旬月請自後遇水旱五六月即以實奏報並言古者城必有池周設司險掌固二官恃溝樹以守請飭及時修舉通川可開支河沮洳可興大圩及諸塘堰宜剏宜修若鎮集宜開溝渠築垣堡者皆造冊具報待歲歉興作以工代賑下部議以五六月報災虛浮冒不可行溝樹塘

暇諸事令各督撫籌議高宗命苞選錄有明及本朝諸大家時藝加以批評示
學子準細書成命爲欽定四書文苞欲仿朱子學校貢舉議立科目程式及充
教習庶吉士奏請改定館課及散館則例議格不行苞老多病上憐之屢命御
醫往視苞以事忤河道總督高斌高斌疏發苞請託私書上稍不直苞苞與尙
書魏廷珍善廷珍守護秦陵苞居其第上召苞入對苞請起廷珍居無何上召
廷珍爲左都御史命未下苞移居城外或以訐苞謂苞漏奏對語以是示意庶
吉士散館已奏聞定試期吳喬齡後至復補請與試或以訐苞謂苞移居喬
齡宅受請託上乃降旨詰責削侍郎銜仍命修三禮義疏苞年已將八十病日
深大學士等代奏賜侍講銜許還里十四年卒年八十二苞既罷祭酒缺員上
曰此官可使方苞爲之旁無應者苞爲學宗程朱尤究心春秋三禮篤於倫紀
既家居建宗祠定祭禮設義田其爲文自唐宋諸大家上通太史公書務以扶
道教裨風化爲任尤嚴於義法爲古文正宗號桐城派苞兄舟文百川諸生與
苞同負文譽嘗語苞當兄弟同壘不得以妻附苞病革命從舟遺言並以弟林

早卒未視飲飲袒右臂以白罰

王蘭生字振聲直隸交河人少穎異李光地督順天學政補縣學生及爲直隸巡撫錄入保陽書院肄業教以治經並通樂律歷算音韻之學光地入爲大學士薦蘭生直內廷編纂律呂正義音韻闡微諸書康熙五十二年賜舉人以父憂歸服除仍直內廷六十年應會試未第上以蘭生內直久精熟性理學問亦優賜進士殿試二甲一名改庶吉士雍正元年散館授編修三年署國子監司業四年員除督浙江學政五年遷侍講六年轉侍讀時查嗣庭汪景祺以誹謗得罪停浙江士子鄉會試蘭生奏言諸生當立品奉公如有潛通胥役欺隱錢糧察出黜懲臣按考所至嚴加曉諭並令地方官開報必使輸糧乃得入試上深嘉之命浙江士子准照舊鄉會試七年擢侍讀學士督安徽學政九年遷內閣學士仍留學政十年命再留任三年尋充江南鄉試考官調陝西學政十三年以所舉士得罪左授少詹事高宗即位召入都復授內閣學士乾隆元年遷刑部侍郎兼署禮部侍郎二年春二月上奉世宗葬泰陵蘭生扈行次良鄉發

病遽作卒於肩輿中賚白金五百治喪涿州待家人奔赴賜祭塋如例蘭生爲學原本程朱光地授以樂律與其校朱子琴律圖說刻本多謬誤以意詳正遂可推據旣入直聖祖授以律管風琴諸解本明道程子說以人之中聲定黃鐘之管積黍以驗之展轉生十二律皆與古法相應又至郊壇親驗樂器推匏土絲竹諸音與黃鐘相應之理其說與管子淮南子相合音韻亦授自光地謂邵子經世詳等而略韻顧炎武音學五書詳韻而略等兼取其長以國書五字類爲聲韻之元以定韻又用連音爲紐均之法以定等皆發前人所未及聖祖深賞之禁中夜讀書惟蘭生侍左右巡幸必以從亟稱其賢留保字松喬完顏氏滿洲正白旗人祖阿什坦字金龍順治初授內院六品他敕哈番繙譯大學中庸孝經通鑑總論諸書九年成進士授刑科給事中留保康熙五十三年舉人六十年與蘭生同賜進士改庶吉士雍正元年散館授檢討累遷通政使六年廣東巡撫楊文乾劾總督阿克敦侵蝕粵海關火耗並令家人索選羅米船規禮諸事上命總督孔毓珣及文乾按治尋文乾卒改命留保及郎中喀爾吉

善會毓珣按治毓珣以上怒將刑訊留保爭之乃免讞定阿克敦罪當死尋復起語詳阿克敦傳留保邊侍郎懋禮吏工三部乾隆初乞病致仕卒年七十七胡煦字治曉河南光山人初以舉人官安陽教諭治周易有所撰述康熙五十一年成進士散館授檢討聖祖聞煦通易理召對乾清宮問河洛理數及卦爻中疑義煦繪圖進講聖祖賞之曰眞苦心讀書人也五十三年命直南書房上方纂周易折中大學士李光地爲總裁命煦分纂尋命直蒙養齋與修卜筮精蘊五十七年遷洗馬與修卜筮彙纂轉鴻臚寺少卿六十一年遷光祿寺少卿再遷鴻臚寺卿雍正元年擢內閣學士命與刑部侍郎馬晉泰如盛京按鞠私劾人獲錄囚百五十八人論罪如律煦還奏劾獲俱貧民羈候按鞠自春夏至九十月往往瘦斃請歸盛京刑部及將軍府尹以時定讞上如所請命嗣後停遣部院堂官按鞠五年擢兵部侍郎兼署戶部時諸部院每於員外增置佐正員治事煦協理副都御史又協辦禮部侍郎八年命直上書房充明史總裁九年授禮部侍郎旋以衰老奪官十年河東總督田文鏡劾煦長子孟基本邱氏

子冒姓以官卷得鄉舉下部議黜乾隆元年煦詣闕召見命還原銜復孟基舉人賜其幼子季堂廕生煦疾作卒於京師費銀五百治喪賜祭葬煦正直忠厚所建白必歸本於教化嘗奏請敕州縣歲舉孝子悌弟督撫旌其門免徭役見長官如諸生其有慈惠廉節篤於交友下逮僕婢行有可稱皆得申請獎勵庶化行俗美人知自愛又請敕州縣勸農桑或別設農官以專其任又言督撫於命盜重案每用自行招認四字援以定罪夫民奸黠者抵死不服愚懦者畏刑自誣請嗣後必證據確然後付法司閱實一有不當旋即駁正庶得慎刑之意他所陳奏如廣言路裕積儲汰浮糧省冗官平權量多切於世務乾隆間高宗詔求遺書徵煦著述時季堂官江蘇按察使以煦著周易函書進五十九年特命追諡諡文良季堂自有傳

魏廷珍字君璧直隸景州人李光地督學招入幕閱卷旋以舉人薦直內廷與王蘭生梅穀成校樂律淵源五十二年成一甲三名進士授編修五十四年遷侍講直南書房五十六年轉侍讀五十九年轉擢詹事復遷內閣學士六十一

年命領兩淮鹽政雍正元年授偏沅巡撫世宗諭曰爾清正和平但不肯任勞怨今爲巡撫宜剛果嚴厲不宜因循退縮二年以辰谿諸生黃先文故殺人讎門殺擬絞遇赦請免會同民譚子壽等因姦斃三命擬斬候皆失出又以撥綠旗兵餉未具題部議降調上諭廷珍學問操守勝人乃料理刑名錢穀非過則不及召回京授盛京工部侍郎三年授安徽巡撫又以按治涇縣吏王時瑞等假印徵賦寬徇爲部駁上戒其母姑息廷珍疏言清查錢糧官吏侵蝕往往匿民欠中不易清察請視民欠多少多限一年少限半年分別詳察官吏侵蝕循例責償如實欠在民督徵催解州縣有逋賦繼任受代許以時察報詔如所請行嗣以清察限促敕部更定廣東總督孔毓珣入對言道經宿州靈璧積潦妨稼上責廷珍怠玩令出俸疏濬廷珍乞內補上不許八年調湖北九年召回京授禮部尙書十年授漕運總督署兩江總督十二年授兵部尙書十三年仍調禮部高宗即位命以尙書銜守護泰陵乾隆三年授左都御史四年遷工部尙書五年以老病乞休上以廷珍在世宗朝服官中外不克舉其職屢奉印誡今

以老病乞休似此因循懈怠持祿保身之習斷不可長命奪官時方苦旱太常寺卿陶正靖謝上入對上問今苦旱用人行政或有闕失宜直言正靖因奏廷珍負清望無大過近日放還天語峻厲非所以優老臣上齊顏聽之後數日上以語禮部尙書任蘭枝蘭枝言正靖其門生也上知蘭枝與廷珍爲同年進士因不懌諭朝臣師友門生援引標榜其端不可開命蘭枝書上諭戒正靖蘭枝書上諭言上問正靖知爲蘭枝門生上詰蘭枝蘭枝對年老耳聾一時誤聽上愈怒責蘭枝詐僞對稱老以舊臣自居下吏議蘭枝正靖皆奪官上命留蘭枝正靖降調十三年上東巡過景州廷珍迎謁命還原銜賜以詩有句曰皇祖栽培士於今賸幾人並書林泉耆碩榜資之十六年又賜詩予其子錫麟廢生二十一年復東巡廷珍迎謁年已將九十又賜詩予錫麟員外郎銜尋卒賜祭葬諡文簡任蘭枝字香谷江蘇溧陽人康熙五十二年一甲二名進士授編修雍正元年命直南書房累遷內閣學士五年與安南定界偕左副都御史杭奕祿齋詔宣諭語詳杭奕祿傳使還邊兵部侍郎命如江西按南昌總兵陳玉章校

饒調吏部高宗即位命充世宗實錄總裁擢禮部尚書歷戶兵工部復調禮部十年以老致仕十一年卒

蔡世遠字聞之福建漳浦人父璧拔貢生官羅源訓導有學行巡撫張伯行延主愷峯書院招世遠入使院校訂先儒遺書世遠康熙四十八年進士改庶吉士大學士李光地以宋五子之書倡後進得世遠深器之四十九年乞假省親五十年遭父喪服除赴京師以假逾期於例當休致世遠不欲以父喪自列會上命竊性理精義光地充總裁薦世遠分修書成世遠不欲以編輯敘勞辭歸巡撫呂猶龍延主愷峯書院以正學教士居久之雍正元年特召授編修直上書房侍講皇子讀孝遷侍講四年遷右庶子再遷侍講學士五年遷少詹事再遷內閣學士六年遷禮部侍郎七年上將設福建觀風整俗使諮世遠命與同籍京朝官議之僉謂福建自海疆平定後泉漳將吏因功驟擢通顯子弟驕悍無所懷畏皇上飭官方興民俗上年學政程元章奏以泉漳風俗未醇責成巡道整飭自此益加儆戒但人有賢愚士或鄙劣薄行民又多因怒互爭未必洗

心滌慮應請設觀風整俗使防範化導於風俗人心有益得旨允行八年福建
總督高其倬劾世遠長子長漢違例私給船照上以疏示世遠世遠奏言臣子
長漢見在京邸此所給照不知何人所爲但有臣官銜圖書非臣族姓即臣戚
屬請敕鞫治部議坐失察降調十年特旨復原職十二年卒世遠待諸皇子讀
講四子五經及宋五子書必引而近之發言處事所宜設誠而致行者於諸史
及他載籍則即興亡治亂君子小人消長心迹異同反覆陳列十餘年來寒暑
無或間十三年高宗即位贈禮部尙書諡文勤所著二希堂集御製序弁首二
希者謂功業不敢望諸葛武侯庶幾范希文道德不敢望朱子庶幾眞希元上
製懷舊詩稱爲聞之蔡先生六十年上將歸政釋奠於先師禮成推恩舊學加
贈太傅子長灃諸生乾隆三年以學行兼優薦發江南以知縣用歷甘泉石埭
句容無錫諸縣兩江總督德沛稱其廉明再遷江甯知府調廬州松江諸府遷
四川按察使二十七年特擢兵部侍郎逾年卒上屢念世遠舊勞推恩其諸子
觀瀾長汭及孫本崇皆賜舉人

沈近思字位山浙江錢塘人康熙三十九年進士四十五年授河南臨潁知縣潁水經許州東入臨潁許州孔家口下距臨潁境僅百餘步隄屢圯水入臨潁害禾稼近思請築隄潁任夫十之七士民爭輸穀日役千三百人人穀二升二十日而隄成水至不爲患歲大熟近思立紫陽書院教士以正學縣西葛岡村俗最惡近思爲置塾課村童立書程簿躬教督之化行於其鄉俗日馴五十二年巡撫鹿祐薦卓異遷廣西南寧同知病告歸五十九年以浙江巡撫朱軾薦敕部調取引見命監督本裕倉浙江福建總督滿保奏請以知府揀發福建檄署臺灣知府近思議析置數縣道鎮倬壓府治駐兵三千分布營汛收材勇入行伍嚴加操練以漸移充內地各標流民至者必審籍貫稽家口方授以田土否則悉驅過洋議未即行雍正元年召授吏部文選司郎中賜第資帑金四百尋授太僕寺卿仍兼領文選司事二年超授吏部侍郎命與尙書阿爾松阿如河南按治諸生王遜等糾衆罷考論如律四年充江南鄉試考官例以鄉試錄進呈上嘉近思命題正大策問發揮性理論獎之時侍郎查嗣庭舉人汪景

祺以誹謗獲罪停浙江人鄉會試近思疏言浙省乃有如闕庭景祺者越水增羞吳山蒙恥因條列整飭風俗約束士子凡十事上曰浙省有近思不爲習俗所移足爲越水吳山洗其羞恥所陳委曲詳盡下巡撫李衛觀風整俗使王國棟如議施行五年擢左都御史仍兼領吏部事卒命平郡王福彭往奠加禮部尙書太子少傅以其子方幼令吏部遣司官爲治喪賜祭葬諡端恪近思少孤貧爲僧靈隱寺世宗通佛理嘗以問近思近思對曰臣少年潦倒時嘗逃於此幸得通籍方留心經世事以報國家亦知皇上聖明天縱早悟大乘然萬幾爲重臣願皇上爲堯舜不願皇上爲釋迦即有所記安敢妄言以分睿慮上爲改容及耗羨歸公議起上意在必行近思獨爭之言耗羨歸公卽爲正項今日正項之外加正項他日必至耗羨之外加耗羨臣嘗爲縣令故知其必不可行上一再詰之近思陳對侃侃雖終不用其言亦不以爲忤也子玉璉世宗命地方官加意撫養成立乾隆中授廣西桂林同知

雷鉉字貫一福建寧化人爲諸生究心性理庶吉士蔡世遠主龍峯書院從問

學雍正元年舉於鄉世遠時爲侍郎薦授國子監學正十一年成進士改庶吉士乞假歸十三年高宗即位召來京命直上書房乾隆元年散館以病未入試特授編修二年大考二等一名賜筆墨硯紗葛同直編修余棟以憂歸端慧皇太子喪入臨上欲留之鏐疏言侍學之臣當明大義爲人倫使棟講書至宰我問三年喪何以出諸口楊名時亦諍之事遂寢四年遷諭德尋以父憂歸九年召來京仍直上書房賞額外諭德食俸十年三遷通政使上以言事者多沽直名自規便利詔訓飭鏐疏言皇上裁成激勸俾以古純臣爲法意至深厚然臺諫所得者名政事所得者實論臣子之分不惟不可計利並不可好名而在朝廷樂聞讜言不必疑其好名並不必疑其計利孔子稱舜大知曰隱惡揚善則知當時進言者不皆有善無惡惟舜隱之揚之所以嘉言罔攸伏成執兩用中之治得旨嘉獎十四年乞假省母十五年還京命督浙江學政十六年上南巡賜以詩謂浙江近福建爲汝便養母也尋調江蘇十八年擢左副都御史仍留督學復調浙江杭州嘉興災致書巡撫周人駿議蠲賑人駿以時已隆冬例不

得補報難之鉉遂疏聞上命蠲賑二十一年乞養母歸二十二年上南巡鉉迎謁上書勞賜其母二十二年丁母憂二十三年鉉未終喪卒年六十四鉉和易誠篤論學宗程朱督學政以小學及陸隴其年譜教士與方苞友爲文簡約沖夷得體要

論曰聖祖以朱子之學倡天下命大學士李光地參訂性理諸書承學之士聞而興起苞與光地誼在師友間名時蘭生廷珍世遠皆出光地門煦亦佐光地修書得受裁成於聖祖叔琳苞友鉉又出世遠門淵源有自獨近思未與光地等游而學術亦無異雍正初與世遠苞先後蒙特擢壽考作人成一時之盛聖祖之澤遠矣

清史稿

列傳七十八

海望

莽鵠立

杭奕祿

傅鼎

陳儀

劉師恕

王國棟

許容
什容
融

汪宜烏雅氏滿洲正黃旗人初授護軍校雍正元年擢內務府主事累遷郎中充崇文門監督八年擢總管內務府大臣兼管戶部三庫賜二品頂戴九年遷戶部侍郎仍兼管內務府授內大臣十一年命借直隸總督李衛勘浙江海塘與衛議奏在海甯尖塔兩山間建石壩使海潮外趨並在仁和海甯兩縣境改建大石塘上命浙江總督程元章相度遊行又奏請設專官總轄令駐防將軍副都統協同監修及議絀在工人員工價以銀米兼發並從之十三年振武將軍傅爾丹虐兵婪索事發命海望赴北路軍營逮治尋命辦理軍機事務世宗疾大漸召同受顧命是時辦理軍機事務鄂爾泰張廷玉訥親班第索柱豐盛

額莽鶴立納延泰及海望凡九人高宗即位命尙書徐本入直旋設總理事務處命鄂爾泰廷玉總理本訥親及海望協辦班第納延泰索柱差委辦事尋命海望著戶部尙書海望還自軍前奏言鄂爾坤發遣罪人種地無實效且恐生事當改發他處世宗謂鄂爾坤方駐兵當可弭壓海望奏非是高宗以海望奏下總理事務處議議上上諭曰海望奏前奉皇考申飭朕推皇考之意蓋以發遣罪人皆身獲重罪今令軍前種地乃所以保全之其中若有冤抑自應聲明具奏寬釋如但以不善開墾遂爾改發內地此曹既獲重罪又不肯急公趨事轉得遂其僥倖之心且如以兵代之兵若以不能力田爲辭則將移內地之民耕邊塞之地乎此事之斷不可行者海望心地純良但識見平常所奏豈可盡以爲是議覆觀望游移後當以此爲戒乾隆二年秦陵工成授拖沙喇哈番世職尋罷總理事務處復設辦理軍機處海望仍爲辦理軍機大臣敍勞復加拖沙喇哈番世職四年加太子少保初上命停捐例廷臣議但留收穀捐監俾各省積穀備荒六年御史趙青藜請並停之復下廷臣議請仍其舊海望奏外省

收捐繁難原議各省捐貯穀數三千餘萬石今報部者僅二百五十餘萬石不足十之一不若停各省捐穀令在部交銀轉撥各省買穀俟倉貯充盈請旨停止上命在部交銀在外交穀聽士民之便論謂地方積穀不厭其多賑卹加恩亦所時有正未易言倉貯充盈也海望久充崇文門監督御史胡定奏言崇文門徵稅有挂錘頂秤諸名百斤作百四五十斤稅額雖未增實已加數倍雜物自各門入恣意需索更數倍於稅額外省各關如杭州北新關自南而北十餘里稽察乃有七處留難苛索百倍於物價蓋由官吏務欲稅課浮於舊額吏胥藉得恣睢無忌請敕嚴禁上曰海望領崇文門稅務儘收儘解盡行入官因而見其獨多如定所奏種種苛索朕信其必無外省關課應令督撫嚴察海望旋調禮部尙書十年上以海望精力漸衰罷辦理軍機十四年復調戶部尙書十七年以建築兩郊壇宇發帑過多與侍郎三和等自行奏請嚴議當奪官上寬之二十年卒遣散秩大臣博爾木查奠茶酒賜祭塋諡勤恪三和納喇氏滿洲鎮白旗人初授護軍校累遷一等侍衛乾隆六年授總管內務府大臣遷戶部

侍郎調工部復調還戶部十四年擢工部尚書尋降授侍郎調戶部復調還工部三十二年授內大臣三十八年卒賜祭塋諡誠毅

莽鵠立字樹本伊爾根覺羅氏滿洲鑲黃旗人曾祖富拉塔居葉赫天聰時來歸隸蒙古正藍旗祖莽吉圖從睿親王伐明徇山東圍錦州擊敗洪承疇援兵入關遂李自成至慶都又從下雲南累擢正藍旗滿洲梅勒額真授世職三等阿達哈哈番莽鵠立事聖祖初授理藩院筆帖式累遷員外郎迭充右翼監督濟墅關監督世宗即位命協辦理藩院侍郎旋擢御史莽鵠立精繪事令恭繪聖祖御容雍正元年改入滿洲以本族別編佐領俾莽鵠立世管出巡長蘆鹽政疏言長蘆諸商行鹽地有額引不能銷者有額外多銷者請通融運銷量增引目從之二年疏請元年積引寬限分銷部議不允再疏請特許之又疏言山東加增引日州縣多寡不均請減多增寡以避商困又疏言增復引目視見辦商人按名均分上允之三年疏言山東寇丁遵康熙五十二年恩詔審丁不加賦下部議行又疏請清察鹽地敕直隸山東督撫遣員清丈邊大理寺卿再邊

兵部侍郎領鹽政如故天津改衛爲州初議隸河間府莽鵠立請改爲直隸州以武清靜海青縣屬焉併丁入地議起莽鵠立以山東甯丁丁多地少請以其半入地其半仍按丁徵賦下部議從之四年以御史顧琮巡視鹽政仍命莽鵠立監理尋調禮部令與顧琮監造天津水師營房工久未竣上以責莽鵠立調刑部召還京五年復調禮部仍署長蘆鹽政授甘肅巡撫六年師入西藏諭莽鵠立赴西甯料理西甯道劉之珍等謀軍興總督岳鍾琪疏劾上以責莽鵠立解巡撫召還京署正藍旗滿洲副都統兼管理藩院侍郎七年擢正藍旗蒙古都統八年命協同辦理直隸水利營田十年調鎮白旗滿洲都統十三年與都統襲英誠公豐盛額並命辦理軍機事務高宗即位改設總理事務處莽鵠立與豐盛額能直回本任尋署工部尙書又調正藍旗滿洲都統乾隆元年卒賜祭塋諡勤敏

杭奕祿完顏氏滿洲鎮紅旗人初授中書雍正元年授額外員外郎未幾補御史即遷光祿寺少卿三年遷光祿寺卿上獨蘇州松江田賦四十五萬杭奕祿

疏言此爲未有殊恩有田納賦既邀蠲免無田而佃種人田者納租業主亦宜酌減俾貧富均霑實惠上謂此奏甚公下廷臣議定業戶免額一錢佃戶免租穀三升上命如議速行擢左副都御史仍兼管光祿寺五年命與內閣學士任蘭枝使安南宣諭初雲南總督高其倬奏安南國界有百二十里舊屬內地應以賭咒河爲界安南國王黎維禱奏辨上命雲貴總督鄂爾泰覆覈予地八十里以鉛廠山下小河內四十里爲界維禱復奏辨上敕維禱毋以侵占內地爲嫌疑懼中辨至是復命杭奕祿等往諭意未至維禱上表謝罪六年命鄂爾泰以鉛廠山下地四十里予安南別頒敕命杭奕祿等齎往宣諭杭奕祿至鎮南關維禱使出關迎進次貂瑤營維禱復使迎勞請儀注議行其國禮五拜三叩杭奕祿等持不可乃請聽命渡富良江至長安門維禱跪迎杭奕祿等捧敕入自中門維禱率將吏等聽宣敕敕曰朕前令守土各官清理疆界未及於安南也總督高其倬職任封疆考志乘訪輿論知開化府與安南分界當在逢春里之賭咒河乃奏聞設汛王疏陳復命總督鄂爾泰秉公辦理鄂爾泰體朕懷遠

之心定界於鉛廠山下小河縮地八十里誠爲仁至義盡此皆地方大臣職分所當爲朕統馭寰區凡屬臣服之邦皆隸版籍安南旣列藩封尺地莫非吾土何必較論此區區四十里之地若王以至情懇求朕何難開恩賜與祇以兩督臣定界時王激切奏請過於歛望失事上之禮朕亦無從施惠頃鄂爾泰以王本章呈奏詞意虔恭王旣知盡禮朕自可加恩將此地仍賜王世守並遣大臣前往宣諭王其知朕意宣畢維禡行三跪九叩禮杭奕祿等復宣諭恩德維禡誓世世子孫永矢臣節杭奕祿等使還維禡送至長安門餽贐杭奕祿等不受至鎮南關維禡使齋謝表請轉奏杭奕祿等還京師疏聞請宣付史館尤之授刑部侍郎署吏部尙書六年湖南靖州諸生曾靜遣其徒張熙變姓名投書川陝總督岳鍾琪略言清爲金裔鍾琪乃鄂王後勸令復金宋之仇同謀舉事鍾琪大駭勸熙不肯言其實乃置熙密室陽與誓將迎其師與謀始得熙及靜姓名奏聞上命杭奕祿及副都統覺羅海蘭如湖南會巡撫王國棟捕靜嚴鞫靜言因讀呂留良評選時文論夷夏語激烈遣熙求得留良遺書與留良子毅

中及其弟子嚴鴻逵鴻逵弟子沈在寬等往還沈瀾其說妄生異心留良浙江石門諸生康熙初講學負盛名時已前死上命逮靜熙毅中鴻逵在寬等至京師靜至廷鞫自承迂妄爲留良所誤手書供辭盛稱上恩德上命編次爲大義覺迷錄令杭奕祿以靜至江甯杭州蘇州宣講事畢命并熙釋勿誅戮留良尸誅毅中並鴻逵在寬等戍留良諸子孫高宗即位乃命誅靜熙七年授杭奕祿鑲紅旗滿洲副都統八年命解部事尋復補禮部侍郎署前鋒統領上命杭奕祿借侍耶朶佛保宣諭準噶爾九年師征準噶爾上慮陝甘民或以用兵爲累命杭奕祿與左都御史史貽直署內務府總管鄭渾寶率庶吉士六部學習主事國子監肄業拔貢生等宣諭化導尋命杭奕祿協辦軍需十年命署西安將軍授欽差大臣察閱甘涼及山西近邊營伍十一年諭責杭奕祿驕奢放縱擾累兵民奪官在肅州荷校乾隆元年召至京師授額外內閣學士補工部侍郎充世宗實錄副總裁遣駐西藏辦事四年奏言西藏西南三千里外巴爾布國有三汗一曰庫庫木一曰顏布一曰葉楞雍正十一年嘗通貢近三汗交惡貝

勅頗羅鼎宜諭罷兵三汗聽命使呈進部落戶口數並貢金銀絲緞珊瑚念珠諸物報聞尋召還調刑部五年擢左都御史列議政大臣十年以老乞休諭留之十一年上察其老憊命致仕十三年卒

傅鼎富察氏字閣峰滿洲鎮白旗人初授侍衛雍正二年授漢軍鎮黃旗副都統兵部侍郎三年調盛京戶部侍郎世宗在潛邸夙知傅鼎好事既即位令隆科多察其爲人隆科多稱傅鼎安靜傅鼎在上前嘗言隆科多子岳興阿甚怨其父謂我家受恩深當將生平行事據實奏聞若稍有隱飾罪更不可追及隆科多被譴追贓岳興阿隱其父財產上以與傅鼎言不符疑傅鼎與隆科多交結慮且敗預爲岳興阿地會傅鼎任侍衛時浙江糧道江國英被劾爲關說得銀萬餘事發上命奪官械繫逮詣京師下刑部按治讞上免死發遣黑龍江九年召還赴大將軍馬爾賽軍營効力尋予侍郎銜授參贊大臣十年準噶爾台吉噶爾丹策零入寇額駙策楞禦之額爾德尼昭噶爾丹策零大敗自推河窺走時馬爾賽駐拜里城有兵萬三千策楞檄速發兵斷噶爾丹策零歸路馬爾

賽不能用傅鼎進曰賊收亡之餘可唾手取也請發輕騎數千俾率以戰事成
功歸大將軍事敗願獨受其罪馬爾賽默然再三言不應至長跪以請終不許
傅鼎憤甚將所部出城遂敵噶爾丹策零已遁走得輜重牛羊萬計事聞上誅
馬爾賽賽傅鼎花翎平郡王福彭代爲大將軍傅鼎參贊如故噶爾丹策零既
大創不敢深入師亦未能遠征上召策棱及大將軍查郎阿詣京師廷議莊親
王允祿及策棱等主進討大學士張廷玉等言不若先撫之不順則進討兩議
上上問傅鼎傅鼎贊撫議降旨罷兵遣傅鼎偕內閣學士阿克敦副都統羅密
諭噶爾丹策零噶爾丹策零欲得阿爾泰山故地傅鼎力折之十三年使還予
都統銜食俸高宗即位命署兵部尙書尋授刑部尙書仍兼理兵部乾隆元年
疏言刑罰世輕世重我朝律例頒布於順治三年酌議於康熙十八年重刊於
雍正三年臣伏讀世宗遺詔曰凡諸條例或前本嚴而朕改從寬此乃昔時部
臣定議未協朕與廷臣悉心斟酌而後更定應照更定之例行若前本寬而朕
改從嚴此以整飭人心風俗暫行一時此後遇事斟酌若應照舊例者仍照舊

例行臣思聖心惓惓於此蓋必有所軫念而未及更正者也皇上以世宗之心爲心每遇奏讞斟酌詳慎臣見大清律集解附例一書見今不行之例猶載其中恐刑官援引舛錯吏胥因緣爲奸請簡熟悉律例大臣詳加覈議律文律注當仍其舊所載條例有今已斟酌改定者應從改定有應斟酌而未逮者悉照舊章務歸於平允逐條繕摺恭請欽定纂輯頒布得旨允行又疏言斷獄引用律例宜審全文若摘引律語入人重罪是爲深文周內律職官吏懷挾私仇故勘平人致死者斬監候又載若因公事干連在官事須問鞠依法拷訊邂逅致死者勿論律意本極平允數年來各督撫遇屬員誤將在官人犯拷訊致死輒摘引故勘平人一語擬斬監候尙書張照又奏准如將笞杖人犯故意夾拷致死二命以上及徒流人犯四命以上俱以故勘平人論不思既非懷挾私仇於故勘之義何居若謂在官之人本屬無罪則必有誣告之人應照律抵罪若謂輕罪不應夾訊命盜等案當首從未分安能預定爲笞杖爲徒流若謂拷訊不依法自有決罰不如法律在致死二人四人以上當議以加等請敕法司酌改

平允下部議行是秋以勸借商銀回奏不實奪官尋命暫署兵部尙書二年授滿洲正藍旗都統三年坐違例發俸發往軍臺効力尋卒

陳儀字子翹順天文安人康熙五十四年進士改庶吉士散館授編修爲古文辭治經世學大學士朱軾器之雍正三年直隸大水諸河泛濫壞田盧世宗命怡親王允祥偕軾相度濬治王求諳習畿輔水利者軾以儀對延見諮治河所宜先儀曰朱子言治河先低處天津爲古渤海逆河之會百川之尾閘今南北二運河東西兩淀盛漲爭趨三岔口而強潮復來拒之抵牾洄漩而不時下下隘則上溢其勢宜然故欲治河莫如先擴達海之口欲擴海口莫如先減入口之水入口之水減則達海之口寬北永定南子牙中七十二沽皆得沛然入三岔口而東注矣四年春從王行視水利教令章奏皆出儀手軾以憂歸王薦於朝命以侍講署天津同知轉侍讀撫庶子仍署同知如故五年王奏設水利營田四局儀領天津局兼督文安大城隄工二縣地卑下積潦不消是秋復大水隄內外皆巨浸儀購秫糶十餘萬束立表下榷以禦水隄本民工儀言於王請

發帑興修招民就工代賑隄得完固南運河長屯隄地隸靜海吏無法歲調發
霸州文安大城民協修百里裹糧咸以爲苦儀爲除其籍畿輔大小諸河七十
餘疏故濬新儀所勘定殆十六七云八年擢侍講學士時議設營田觀察使二
員分轄京東西以督率州縣命儀以僉都御史充京東營田觀察使營田於天
津傲明汪應蛟遺制築十字圍三面開渠與海河通潮來渠滿閉渠蓄水以供
灌溉白塘葛沽間斥鹵盡變膏腴豐潤玉田地多沮洳儀教之開渠築圩皆成
良田十一年大雨山水暴發沒田廬儀疏聞諭籌賑卽命儀董其事凡賑三十
四萬餘口十二年轉侍讀學士尋罷觀察使還京師儀篤於內行先世遺田數
百畝悉推以讓兄既仕分祿畀昆弟周諸故舊有故人子貧甚屬門生爲謀生
業事爲人所訐吏議當降調乾隆二年授鴻臚寺少卿儀以老乞歸七年卒年
七十三子玉友雍正八年進士官臺灣知府勤其官有惠政

劉師恕字艾堂江南寶應人父國祿康熙二十一年進士改庶吉士授戶科給
事中歷督捕理事官在戶科建言民田畝有大小地有上中下請具載簡明賦

役全書明示天下在督捕詳考則例刊布之往時以逃人爲根以一累百十以逃案爲市取所歷州縣官職名待劾弊不勝詰皆剔除之乃裁併兵部改授鴻臚寺卿師恕三十九年進士選庶吉士授檢討累遷國子監祭酒雍正元年授貴州布政使四年遷通政使轉左副都御史擢工部侍郎上以宜兆熊署直隸總督調師恕禮部協理總督事五年奏獲交河妖民孫守禮嚴鞫治罪上獎其遇事直達不稍隱諱師恕與兆熊議裁學政陋規學政孫嘉淦言學政舊規日得五十五兩今減半卽足用師恕言減至一兩亦不可行當另奏撥解公費師恕與兆熊奏已與嘉淦會商裁革嘉淦以實奏上諭曰孫嘉淦非騷擾貪饕者比爾等何不量至此可仍循舊例而行嘉淦端士也宜作成之初夏保定諸府少兩上以爲髮師恕等言今歲遇閏此後得兩不遲上責其怠忽尋奏裁驛站夫馬工料羨餘銀上諭曰陋規自應裁第當量情酌理爲之母過刻令後來地方諸事難於措辦也調吏部仍留協理大名諸生竇相可訴知府曾逢聖貪劣布政使張适杖殺之以獄斃報兆熊師恕匿不以聞上命尙書福敏等按治得

質兆熊坐降調上寬師恕諭責其徇隱命何世璠署直隸總督仍令師恕協理七年命師恕以內閣學士充福建觀風整俗使八年疏言海澄公舊以轄兵給印後兵裁而印未繳今海澄公黃應纘濫行印文非所宜當令繳銷並言外省世襲武職年及二十當令各部引見分京外學習部議從之十一年師恕以病告省觀風整俗使不復設乾隆七年寶應災治賑非貧民例不給師恕族人諸生啗嗾不得賑者聞堂罷市上責師恕不能約束奪官南巡迎謁賜侍讀學生銜二十一年卒是時廣東湖南皆置觀風整俗使焦祈年字穀貽山東章邱人雍正元年進士改庶吉士授編修考選雲南道御史擢順天府丞權府尹遷右通政八年命充廣東觀風整俗使修建十府二州書院延通人爲之師濱海多盜設策鉤捕得劇盜百餘置諸法盜差熄奸民以符割感衆擒治之赦其株連者西洋人置天主堂使徙歸澳門簡閱營伍軍政以肅擢光祿寺卿召爲順天府尹旋調奉天行次山海關疾作乞歸卒於里李徽字元綸山西崞縣人康熙五十二年鄉試舉第一雍正元年進士改庶吉士散館刑部主事尋復授檢討

考選浙江道御史是時遣御史巡察順天直隸諸府順天永平宣化爲一員保定正定河間爲一員順德廣平大名爲一員徽巡察順德廣平大名三府曾靜張熙事起上慮湖南士民爲所惑議遣使循行訓迪以大學士朱軾薦遣徽勸諭化導尋授僉都御史充湖南觀風整俗使徽在官四年察吏安民能稱其職坐事降授倉監督高宗即位命復官遽卒廣西學政衛昌楨請設觀風整俗使御史陳宏謀繼請上諭宏謀等曰廣西通籍者本少乃已有狂悖如謝濟世陸生柁者風俗薄劣可見爾等不能端本啟源躬先表率而望秉鐸司教之官家喻戶曉易俗移風所謂逐末而忘其本也議寢未行

王國棟字左吾漢軍鑲紅旗人康熙五十二年進士改庶吉士授檢討累遷光祿寺卿雍正初查嗣庭汪景祺坐文字謗訕見法上謂浙江士習澆漓四年設浙江觀風整俗使以授國棟國棟至官巡行宣諭清逋賦懲唆訟飭營伍嚴保甲次第疏聞上溫諭獎之遷宗人府府丞五年上以浙江被水米貴命國棟同巡撫李衛發庫帑四萬於杭州嘉興湖州三府修城濬河築隄俾饑民就傭食

力國棟奏杭州至海甯塘河淤當濬治太湖隄閘及嘉興石塘多傾圯當修理
冬春雨雪工作多費請俟九月水落興工上韙之尋擢湖南巡撫以許容代
爲浙江觀風整俗使上諭國棟曰初欲令爾在浙整飭數年俾收成效但湖南
廢弛久今以命爾爾其勉之上命湖廣總督邁柱修兩省隄工國棟疏言湘陰
巴陵華容安鄉澧武陵龍陽沅江益陽九州縣環繞洞庭居民築隄堵水而耕
地勢卑下江漲反灌入湖隄岸衝決見有四百餘處正飭刻期完築務加高培
厚工程堅固僉都御史申大成奏貴州屯田民間賤價頂種易啓紛爭請做民
田買賣畝納稅五錢給照爲業並推行各省國棟疏言湖南屯田瘠薄應分別
差等徵價頂種令完稅五錢給照如時價平買未過戶者視屯糧石稅五錢已
過戶者二錢龍陽武陵長靖諸屯賦重按券值兩稅三分均下部議行曾靜張
熙事起上令侍郎杭奕祿至湖南會鞠國棟聽靜自列未窮究黨羽允祺允禔
門下太監以罪徙廣西流言於路直隸河南督撫俱疏上聞國棟奏言湖南監
送兵役未聞一語又茶陵民陳蒂西傳播流言敕國棟按鞫亦不得實證坐是

失上指奪官召還京八年命治刑部侍郎事署山東巡撫九年河南祥符封邱等縣水災命往治賑迭署江蘇浙江巡撫十年仍還刑部十二年以議福建民藍厚正殺兄獄失當吏議降調十三年復命署刑部侍郎卒許容河南虞城人康熙五十年舉人授陝西府谷知縣內遷工部員外郎考選廣西道御史雍正元年改會考府郎中仍兼御史出爲直隸口北道遼陝西按察使劾河東巡鹽御史馬喀以積鹽變價入己上奪馬喀官命兼管河東巡鹽御史按治尋聞容刑逼商人解容任令總督岳鍾琪覆按鍾琪言容無刑逼商人事上擢浙江布政使五年代國棟爲浙江觀風整俗使尋借廣東巡撫楊文乾清察福建倉庫六年遭母喪給假治喪畢命仍還浙江旋擢甘肅巡撫以蔡仕艸代爲浙江觀風整俗使容疏議更正律例出贓過付人宜視完贓減二等得贓者完贓減一等倍完方減二等連斃二命宜加等上皆謂不當責容愚妄八年師征噶爾丹上以容治軍需多推諉命尙書查弼納赴陝西爲之董理及事竟上諭容曰此次軍需朕爲挽將覆之轍回已頽之波救汝身家性命較自御史五年內擢至

巡撫之恩大矣汝當知之上聞容追逋賦抵兵餉限一年全完民以大擾諭曰朕念甘肅自軍興以來輓運轉輸資於民力特將雍正八年額徵錢糧蠲免容何得於蠲免之年行催徵之舉令卽停止九年復以容查核錢糧過刻諭毋累民十二年疏劾丁憂知府李綺虧空軍需綺衛兄也上知容與衛有怨戒容毋遷怒報復容旋奏檄綺赴蘭州虧空七千有奇限半年回籍措繳上諭曰所虧既有田房可抵但當速遣回籍折變完補何須勒限逼迫乾隆元年固原環二縣歉收容請借給貧民三月口糧大口日三合小日日二合高宗諭曰政莫先於愛民甘肅用兵以來百姓急公踴躍今值歉收當加恩賑恤汝治事實心而理財過刻國家救濟貧民非較量錙兩時也尋專筦軍儲大臣劉於義奏請加賑兩月上責容褫隘卑庸命解任於義及陝西總督查郎阿劾容匿災殃民奪官逮詣京師論罪赦免二年署山西布政使三年調江蘇署巡撫四年遭父喪去官五年命署湖南巡撫請終喪不許服闋員除八年以劾糧道謝濟世狂縱營私失實奪官發順義城工効力事互詳濟世傳九年復命署湖北巡撫御史

陳大珩等疏諍謂容既以欺罔得罪不當復用上命罷之十五年上巡中岳迎謁復原銜尋授內閣學士以病乞歸卒蔡仕勳福建南安人康熙三十二年舉人五十八年自刑部主事考選御史出爲浙江糧道雍正六年授僉都御史充浙江觀風整俗使七年署巡撫八年坐事降調上諭曰浙江風俗已漸改移又有總督李衛善於訓導不必再遣觀風整俗使仕勳旋卒

論曰海望莽鵠立皆速事聖祖雍正乾隆間參與政事海望聞世宗末命在軍機處較久雖建樹未宏要爲當時親信大臣杭奕祿使安南傅鼎諭噶爾丹策稜皆不辱君命傅鼎尤知兵儀領屯田有惠於鄉州師恕國棟等使車問俗與民爲安靜以皆世宗特置之官特謹而書之杭奕祿又與史貽直宣諭陝西非專官貽直相高宗故不著於斯篇

清史稿

列傳七十九

高其倬

字文範

楊宗仁

字文範

孔毓珣

裴鋒度

字宗範

唐執玉

楊永斌

高其倬字章之漢軍鑲黃旗人父應爵官口北道其倬康熙三十三年進士改庶吉士散館授檢討尋兼佐領五遷內閣學士五十八年河南南陽鎮兵挾忿圍聲知府沈淵命偕尙書張廷樞按治誅首事者總兵高成等論罪有差五十九年授廣西巡撫鄧橫苗叛其倬親撫之降六十一年世宗即位擢雲貴總督疏言土司承襲向有陋規已嚴行禁革咨部文冊如無大舛錯請免駁換旨嘉獎青浦台吉羅卜藏丹津叛侵西藏其倬以中甸爲入藏要道檄諸將劉宗魁劉國侯等嚴爲備並遵上指令提督郝玉麟將二千人自中甸進駐察木多副將孫宏本將五百人赴中甸爲聲援雍正二年師定青海中甸喇嘛番酋等率三千五百戶納土請降上嘉其倬能予世職拜他勒布喇哈番其倬規畫安撫

中甸疏請設同知以下官番酋管官外又有神翁列寶諸號聽堪布喇嘛指揮請改授守備千把總劄付聽將吏統轄僧寺喇嘛以三百爲限收兵械入官沿江數百里及山谷曠土招民開墾舊行滇茶視打箭爐例設引收課魯魁山者白國初爲盜藪夷裸雜處推楊方普李四姓爲渠有方景明者挾裸夷掠元江其倖遣兵擊破之擒景明殲裸夷數百疏請於其地駐兵號普威營參將駐普洱守備駐威遠茶山改威遠歸流設同知以下官土官刁光煥及其孥移置會城而以新開二鹽井充新設兵餉設義塾教夷人子弟元江府學額外增額二名待其應試勸夷人墾田旱田十年後水田六年後升科貴州狝家苗酋阿近及其弟阿臥爲亂其倖使撫定傍近諸苗寨阿近等失援遣兵擒戮之並按治定番廣順諸苗酋不順命者疏請改設定番協分置營汛防定番廣順及西猛西藤斷杉樹長寨遮貢羊城圭諸地又移都勻守備駐獨山改湖廣五開衛爲縣移隸黎平並言貴州地連川楚奸人掠販貧家子女爲民害請飭地方官捕治歲計人數爲課最貴州民間陋俗被人劫殺力不能報則掠質他家人畜令

轉爲報仇不應則索贖謂之拏白放黑請加等治罪土司貧困田賦令屬苗代納請清察責執業者完賦土司下設權口人等請令報有司有罪併懲詔悉如所請三年進兵部尙書銜加太子少傅調福建浙江總督瀕行疏言鄧川嵩明騰越太和浪穹諸州縣土軍丁銀起明嘉靖萬厯間遣民防夷立太和風梧二所丁徵賦一兩是於本貫已完民賦請豁除軍糧詔從之四年疏言福興漳泉汀五府地狹人稠無田可耕民且去而爲盜出海貿易富者爲船主爲商人貧者爲頭舵爲水手一舟養百人且得餘利歸贖家屬曩者設禁例如虛盜米出洋則外洋皆產米地如虛漏消息今廣東估舟許出外國何獨嚴於福建如虛私販船料中國船小外國得之不足資其用臣愚請弛禁便下怡賢王會大學士九卿議行五年臺灣水連社番爲亂其倬遣兵討之擒其渠骨宗等諸社悉降尋以李衛爲浙江總督命其倬專督福建迭疏請整飭鹽政改造水師戰船釐定營汛並下部議行入覲加太子太保上以其倬通堪輿術命詣福陵相度其倬還奏陵前左畔水法因溢流更故道弓抱之勢微覺外張當順導河流

方爲盡善下大學士等如所議修濬八年調江南江西總督復召至京師令從
怡賢王勘定太平峪萬年吉地進世職三等阿思哈尼哈番命署雲貴廣西總
督十一年普洱屬思茅土把總刁國興糾苦葱蠻及元江夷爲亂攻普洱通關
大寨獮夷復附苦葱蠻度阿墨河攻他郎其倬檄提督蔡成貴等分道捕治擒
其酋並所屬五百餘亂乃定是歲春命其倬回兩江總督秋命以總督銜領江
蘇巡撫十二年坐徇知縣趙崑理償海塘工欵部議降調卽授江蘇巡撫乾隆
元年召還京師復授湖北巡撫調湖南討平城步綏甯二縣獠亂三年擢工部
尙書調戶部其倬詣京師過資應疾作卒於舟次賜祭葬諡文良金鉞字震方
漢軍鑲白旗人世居登州父延祚從世祖入關官至工部侍郎鉞初自監生授
江西廣昌知縣洊升山西太原知府雍正五年擢廣西按察使尋遷布政使六
年就擢巡撫討平西隆州八達寨叛苗以汛兵少粵土蕪不治奏開屯田與民
牛招之耕教以技勇每名給水田十畝一畝爲公田旱田二十畝二畝爲公田
存公田租於社倉行之數年闢田數萬畝倉廩亦實又奏請召商開桂林屬諸

鑛及採梧州金砂供鼓鑄乾隆元年提督霍昇劾鑛言躁氣浮失封疆大臣之體高宗召入京授刑部侍郎鑛瀕行裝不治以印券屬蒼梧道黃岳牧借銅務充公銀千二百巡撫楊超曾論劾奪官交刑部嚴訊上以非正項錢糧鑛以印券支借岳牧以印册申解非侵蝕比命免罪毋追所借銀五年授河南布政使而鑛已卒鑛才通敏自太原入覲方議耗羨歸公鑛奏曰財在上不如在下州縣親民官嘗使留其有餘養廉不能肯足一遇公事動致俯張上意豈不曰凡是官辦皆許開支正供但從司院按覈以至戶部層層隔閡報銷甚難從此州縣恐多苟且之政上意在必行臣請養廉外多增公費或存縣或存司庶於事有濟上乃敕直省覈定公費及爲廣西布政使奏請州縣分衝繁疲難四項許督撫量才奏補上嘉納之州縣缺分四項自此始

楊宗仁字天爵漢軍正白旗人監生康熙三十五年授湖北慈利知縣苗曾虐其衆走縣境苗曾求之不與上官檄與之宗仁持不可乃止調藍山八排苗爲亂巡撫趙申喬遣兵討之將不恤兵兵將爲變宗仁單騎撫定之舉卓異四遷

甘肅西甯道五十三年授浙江按察使丁父憂歸五十七年起廣西按察使署
巡撫旋擢廣東巡撫聖祖以各直省錢糧多虧空諭督撫清理宗仁疏言廣東
虧空見正嚴飭追完至防杜將來惟有督撫司道府廳交相砥礪勿藉事勒索
州縣正雜錢糧當責知府不時察覈毋許虧缺倘敢徇縱本官治罪上司從重
議處庶上下皆知儆惕地方有不得已事當以督撫等所得公項抵補不敷則
濟以公捐必不使課帑虛懸下部議如所請六十一年世宗即位授湖廣總督
雍正元年丁母憂命在任守制宗仁疏停本身封廕爲父母求諭祭許之仍給
封廕尋賜孔雀翎疏言湖廣舊習文武大吏收受所屬規禮致州縣橫徵私派
將弁虛兵冒餉兵民挾比逞私不敢過問臣今概行禁革庶驕兵玩吏錮習潛
消各官貪得鹽規鹽價增長民間嗟怨總督鹽規漸次加至四萬臣亦行禁革
令商平價以惠窮民上深嘉之又疏言官有俸役有工朝制也湖廣州縣以上
俸工報捐已十餘年官役枵腹安能禁其擾民請自雍正元年起俸工如額編
支從前有公事令州縣分捐實皆轉派於民令州縣於加一耗羨內節省二分

交藩庫充用此外絲毫不得派捐上諭曰所言皆是勉之尋薦廣東南海知縣宋瑋擢湖南寶慶知府廣州左衛守備范宗堯改湖北漢陽知縣上允之命後勿踵行宗仁病作請以子榆林道文乾自侍上加文乾按察使銜馳驛速往並遣御醫診視宗仁力疾視事飭諸州縣編保甲立社倉罷荊州關私設口岸百五十處三年加太子少傅尋卒贈少保予拜他喇布勒哈番世職賜祭葬諡清端宗仁砥節矢公始終一節上爲製象贊謂廉潔如冰耿介如石嘗言士當審其所當爲嚴其所不可爲其馭屬吏寬平忠厚務安上全下使各稱其職而止文乾字元統以監生效力永定河工康熙五十三年授山東曹州知州遷東昌知府舉卓異遷陝西榆林道雍正元年加按察使銜命侍宗仁任所三年宗仁病有間入謝上問湖廣四鎮營制及設鎮始末文乾具以對上嘉其詳審擢河南布政使未幾遷廣東巡撫入謝賜孔雀翎冠服鞍馬宗仁卒命在任守制廣東省城多盜文乾令編保甲以滿洲兵與民連居會將軍編察疏聞上嘉之廣東歲歉米貴文乾令吏詣廣西買穀平糶滿洲兵聞尙義等羣衆掠穀文乾令

捕治將軍李枚庇兵文乾請遣大臣按治上命侍郎塞楞額阿克敦往勘枚及尙義等論罪如律文乾莅政精勤多所釐正疏言廣東民納糧多用老戶臣令改立的名杜詭寄飛灑諸弊民以爲便丁銀隨糧辦者十四五餘令布政使確核盡歸地糧得旨嘉獎又疏言廣東地狹人衆見存倉穀一百六十餘萬石爲民食久遠計應加貯二百餘萬石擇地建倉貯穀下廷議令於海陽潮陽程鄉饒平海豐瓊山加貯穀三十四萬石從之又疏言廣東公使銀歲六七萬取諸火耗臣爲裁省歲計需四萬餘擬以民間置產推糧易戶例納公費及屯糧陋規兩項充用州縣火耗每兩加一實計一錢三四分有奇十之五六留充州縣養廉十之七八爲督撫以下各官養廉上諭之曰但務得中爲是民不可令驕慢屬吏亦不可令窘乏天下事惟貴平當徹始終籌畫慎毋輕舉五年乞假葬父福建巡撫常賚劾文乾征粵海關稅設專行六得銀二十餘萬又疏劾文乾匿粵海關羨餘銀五萬餘縱綱緞出洋得銀萬餘番銀加一扣收得銀四萬餘選洋船奇巧之物入署令專行代價又銀二萬餘又以銀交鹽商營運上嚴諭

文乾令愧悔痛改尋以福建倉庫虧空命文乾與浙江觀風整俗使許容等往按而移常資署廣東巡撫文乾令分路察核官虧民欠分別追納不敷責前巡撫毛文銓償補上獎文乾秉公無隱顧文乾疏言福建府州縣各官都計八十員前後効罷五十餘員新補各官守倉庫有餘理繁劇不足請選熟諳民事者詣福建補繁要州縣上爲敕各督撫各選謹慎敏練之吏咨送福建文乾強幹善折獄初知曹州有婦告夫爲人殺者文乾視其屨白問曰若夫死若預知之乎曰今日乃知之曰然則汝何辨白屨之夙也婦乃服以姦殺夫五人者同宿其一失金訟其四文乾令坐於庭視久之曰吾已得盜金者非盜聽去一人欲起執之果盜金者曹民有僞稱朱六太子者挾妖術惑愚民朝命侍郎勒什布湯右曾按治檄至文乾秘之密捕得送京師在東昌請運糧饋軍出西甯先期至以是受知於世宗然頗與同官多齟齬赴廣東途中疏劾布政使朱絳倚總督孔毓珣有連虧帑三萬餘毓珣疏先入上命文乾毋聽屬吏離間既上官疏言盜案屢積請概爲速結上諭曰孔毓珣緝捕盜賊甚盡力彼擒之汝縱之恐

汝不能當此言縱虎歸山豈爲仁政宜加意酌在福建毓珣入覲上命侍郎阿克敦署兩廣總督文乾毓言盜劫龍門營軍器阿克敦令從寬結案將軍標兵窩盜將軍石禮哈祖兵謂告者誣良旣上命常費還福建而以阿克敦署廣東巡撫六年文乾還廣東勅阿克敦勒索暹羅商船規禮布政使官達縱幕客納賄皆奪官命文乾與毓珣會鞫未及訊文乾卒賜祭葬子應琚自有傳

孔毓珣字東美山東曲阜人孔子六十六世孫父恩洪福建按察使康熙二十三年上幸曲阜釋奠毓珣以諸生陪祀賜恩貢生二十九年授湖廣武昌通判舉卓異邊江南徐州知州徐州民敵於丁賦毓珣在官七年拊循多惠政三十九年河道總督張鵬翮以毓珣熟於河務薦授邳睢同知四十三年遷山西平陽知府未上改雲南順甯四十六年調開化以母憂去官五十年服終除四川龍安毓珣歷守邊郡皆因俗爲治弊去其太甚邊民安之再舉卓異五十五年遷湖廣上荆南道築隄捍江民號曰孔公隄五十六年遷廣西按察使廣西地瘠民悍犛獠爲民害靈川獠曾廖三屢出焚掠毓珣白巡撫陳元龍遣兵捕得

寘諸法諸苗嬰服五十七年授四川布政使西藏方用兵毓珣轉饒出察木多不以勞民重築灌江口堰四川民尤德之六十一年擢廣西巡撫雍正元年加授總督廣西提鎮標空糧毓珣飭募補疏言各官俸不足自贍請於定例外量加親丁名糧上命酌中爲之廣西諸州縣舊有常平倉毓珣議春耕借於民秋收還倉年豐加息歉免息荒緩至次年還本日久穀多分貯四鄉建社倉擇里中信實者爲司出入又言地多盜獠雜處保甲不能徧立諸鄉多有團練令選誠幹者充鄉勇得盜者賞怠惰者罰又言廣西邊遠鹽商多滯運民憂淡食請發藩庫銀六萬官爲運銷行有贏餘本還藩庫並可量減鹽價並從之柳州獞莫貴鳳出掠馬平柳城永福諸縣毓珣遣兵捕治毀其寨寘貴鳳於法來賓獞單扶成等出掠未傷人毓珣令予杖荷校滿日充撫標兵散其黨類疏聞上嘉其寬嚴兩得二年授兩廣總督上諭之曰廣東武備廢弛劫掠公行舉劾官吏百無一公爾當盡心料理毓珣疏請釐定鹽政寬丁鹽價船戶水脚增十之一並免埠商羨餘設潮州運同鹽運司經歷大金蕉木兩山產礦砂東隸開建

連山西隸賀縣懷集舊制懷集汛屬潯州協毓珣請改屬梧州協賀縣開建連山並增兵設汛廣東香山澳西洋商船毓珣請以二十五艘爲限皆下部議行潮州田少米貴民賴常平倉穀以濟毓珣請提鎮各營貯穀借兵散餉時買還概免加息上特允之三年加兵部尙書銜四年毓珣請入覲上以毓珣習河事令詳勘黃運諸河水勢協同齊蘇勒酌議毓珣疏言宿遷縣西黃河與中河相近舊有汰黃壩運河水大引清水刷黃黃河水大引黃水濟運舊時黃水入中河不過十之一二今河南岸沙漲逼水北行水流甚急齊蘇勒議收小汰黃壩口以束水勢臣詳勘南岸漲沙曲處宜濬引河以避此險仍俟齊蘇勒相度定議又陳江南水利言吳淞劉河七浦白茆諸閘宜令管閘官役隨潮啟閉江蘇地形四高中下宜令力勸築區立圩濱河諸地民占爲田廬其無甚害者姑從民便餘宜嚴禁支河小港宜令於農隙深濬即取土培圩並敕部議行又言道經宿州靈壁見溝洫不通積雨成潦請飭安徽巡撫疏濬上嘉毓珣實陳五年還廣東巡撫楊文乾劾署巡撫阿克敦布政使官達上命通政使留保等往按

毓珣失察當下吏議上命寬之尋調江南河道總督上以天然壩洩水慮溢浸民田命毓珣相度築隄東水歸湖毓珣疏言天然南北二壩分洩水勢年年開放隄口殘缺當如上指築隄東水請於南岸王家庵至趙家莊築新隄一道舊隄尾距湖尚二十餘里請於南岸馬家圩至應家集北岸周家圩至李君橋各築新隄一道並將南北舊隄加培高廣庶兩隄夾束湍流無患旁溢上又以高家堰爲蓄清敵黃關鍵發帑百萬命毓珣籌畫毓珣疏言高家堰石隄自武家墩至黃莊地高工固惟侯二門等四壩及小黃莊至山盱古溝東壩當一律加高又言各隄加培高廣宜視地勢緩急舊隄厚薄分年修增期三年而畢嗣後仍按年以次加培又請修築宿遷鈔關前桃源沈家莊河隄瓜洲由關上游沿越河一道並建草壩束水諸疏入並報可毓珣積瘁遺疾上賜以藥餌命其子刑部郎中傅嘉偕御醫馳驛往視未至毓珣卒賜祭葬諡溫僖

裴鋒度字晉武山西曲沃人少爲諸生工詩能書畫入資爲主事康熙三十五年授刑部主事游擢戶部郎中四十九年授雲南澂江知府調廣南以大計入

親聖祖聞其能詩命題應制稱旨五十五年遷河東鹽運使尋改兩浙海甯察塘巡撫徐元度檄倅度董其事潮大至撼塘塘欲裂倅度據地坐督役力護久之乃定倅度自是中濕病重腿終其身五十九年遷湖北按察使六十年遷貴州布政使雍正元年擢江西巡撫九江舊設關榷稅後徙湖口湖口當江湖衝水急商舟時覆倅度疏言九江舊關上有龍關河官牌夾下有老鶴塘白水港地勢寬平泊舟安穩離湖四十里曰大姑塘爲商舟所必經水漲則有女兒港張家套皆可泊舟水落則平湖一綫夾岸泥沙無風濤礁石之險請仍移關九江而於大姑塘設口分抽上令會同總督查覈納料理南昌袁州瑞州三府賦額明沿陳友諒之舊視他府偏重順治間減袁瑞二府賦額而南昌未及倅度疏言常賦未易屢更同省實難歧視請將南昌賦額視袁瑞二府同予核減下部議減南昌浮額七萬五千五百兩有奇福建廣東流民入江西就山結棚以居斂蕈葉煙草謂之棚民往往出爲盜萬載溫上貴甯州劉允公等皆以棚民爲亂倅度捕治論如律上令編保甲倅度疏言棚民良莠淆雜去留無定或

散居山等或爲土民傭工墾地臣飭屬嚴察凡萬五千餘戶編甲造冊按年入籍上獎勉之上聞江西里長催徵累民多尙邪教諭律度禁革律度疏言臣察知里長累民已勒石永禁令糧戶自封投櫃距城較遠崎寒小戶願輸雇交納者聽其便仍嚴防不得干累邪教自當捕治醫卜星相往往假其術以惑民雖非邪教亦當以時嚴懲上深嘉之總督查蠲納議開廣信封禁山諭律度酌度律度疏言封禁山舊名銅塘山相傳產銅然有名無實故自明封禁至今順治間有議採木者郡縣力陳不便勒碑永禁臣揆查蠲納意或以棚民巢穴在此山中故爲破巢搗穴之計此山荆棘充塞稔毒滋藏並非有梗化頑民盤踞在內臣詳度此山開則擾累封則安甯成案具存確有可據論曰當開則不得因循當禁則不宜依違但不存貪功之念實心爲地方興利除害何事不可爲在卿等秉公相度時宜而酌定之仍封禁如初四年遷戶部侍郎擢左都御史上遣侍郎邁柱勘江西諸州縣倉穀命律度留任邁柱疏言倉穀虧空甚多例定穀一石折銀二錢州縣交代按此數接收不敷糴補上奪律度及歷任布政

使張楷陳安策官命以所存折價買穀還倉十年事畢釋還里乾隆五年卒子宗錫入資爲同知十五年授山東濟南同知屢遷轉二十八年授直隸朔昌道遷直隸按察使疏言古北口外山場產菠蘿樹此即橡樹葉可飼蠶臣在濟東飭屬通栽頗有成效請令川東省養蠶法廣栽試養命交總督方觀承試行三十二年以母憂去官宗錫在任誤應驛站車馬部議當降調總督楊廷璋咨部言宗錫嘗自行檢舉上諭曰宗錫朕知其爲人頗可造就按察使管理驛站偶有一二誤應原屬公過今已丁憂安得自行檢舉廷璋乃令作此趨避愛之適以害之也三十五年宗錫服將闋仍授直隸按察使俄擢安徽布政使就遷巡撫疏言安慶瀕江舊有漳葭港上通潛山太湖望江三縣下達江漕艘商舶往來停泊淤久漸成平陸前巡撫張楷於上游別開新河地高水急重載逆上遇風每虞覆溺請仍濬漳葭港故道命總督高晉履勘如宗錫議行又疏言鳳泗所屬州縣高地宜多作池塘低地宜厚築圩圍以備灌溉資捍禦風陽地多高岡曠野不宜五穀令視土宜種樹諭獎其留心本務四十年調雲南旋命署貴

州疏言貴州地處邊圉請敕部撥銀三十萬貯司庫從之又疏請增設鎮遠稅口上嚴斥不許又疏言貴州額輸京師及湖廣白鉛歲七百餘萬斤鉛廠僅三處年久產絀臣察知松桃廳巴壩山遵義縣新寨產鉛近水次已飭設廠歲各得鉛百餘萬斤分撥京師湖廣歲節省運費銀四萬三千有奇得旨嘉允又疏言貴州古州有牛皮大箐亘數百里列屯置軍應將箐內平曠之士開墾成田寓防於屯安屯養軍丹江雷公院地平衍可墾四五百畝歐收前荒高箐二地畸零可墾二四百畝應令附近震威堡屯軍派撥試墾並於丹江營移撥千總一兵五十人籌設卡駐守時上已命宗錫還雲南命交後政圖思德如所議行四十四年以病乞解任旋卒賜祭葬

唐執玉字益功江南武進人康熙四十二年進士授浙江德清知縣德清盛科第多鉅室執玉執法無所撓將編審吏以例餽金執玉卻之而罪其吏召縣民親勘有田無糧者令自首有糧無田者除之富無隱糧貧無賂累行取工部主事考選戶科給事中五十八年疏言戶部錢糧款項最易作弊當先驅除作弊

之人乃有所謂缺主者或一人占一司或數人共一省占爲世業句通內外書吏舞文弄法當嚴行查禁因劾山西司缺主沈天生包攬捐馮事例下九卿議逮治六十年遷鴻臚寺卿歷奉天府府丞大理寺少卿雍正二年歲三遷禮部侍郎五年擢左都御史七年命署直隸總督執玉治事勤州縣稍歛收必籌畫賑卹隆平報產瑞禾三十三本執玉於報秋成摺附奏上嘉之適貢荔支至命以賜執玉方有疾治事如常時宗人府府丞冀棟以醫進上命視執玉疾賜人葠諭令愛養精神量力治事若欲棟料量方藥保定咫尺可再命之來也熱河徵落地稅司其事者議增歲額並於榜什營等地設口徵稅下執玉議執玉言商稅多寡視歲收豐歉故止能折中定額榜什營距一百八十餘里已收落地稅又抽進路鈔銀恐商賈不前正稅反缺請如舊便議乃寢長蘆巡鹽御史鄭禪寶以商人虧帑請增鹽價上以詢執玉執玉言上於商民無歧視諸商不謹身節用先公後私乃至虧帑欲增鹽價厲民臣以爲非宜亦罷不行八年春入覲深慮龍遷安撫甯昌黎樂亭諸州縣米貯喜峯口倉虧二千五百餘石執玉

請視通州中西二倉例免追償部議不許上特允之密雲城臨白河舊築土木
隄壩盡圯僅存石隄上游有積土斜出激水使怒俗謂之土嘴執玉疏請疏治
使水得暢流仍築土隄務堅厚用榆圍載石爲基使輔石隄護縣城上褒其妥
協命於夏月水漲前竟工遷兵部尙書仍署總督是歲秋積雨永定滹沱諸水
皆盛漲執玉疏報災上命侍郎牧可登副都統阿魯等分往治賑執玉奏言諸
州縣被水消長不一有上諭所及而水消未成災者有上諭所未及而水大成
災田廬被淹急須拯卹者請飭治賑諸臣勘實上特允之國初以民地予滿洲
將士謂之圈地民地既圈以隣近州縣地撥補糧額從舊貫於是寄糧佃租
戶移新地於是有寄莊歷年既久百弊叢起上令執玉勘察吏除改正並舉懷
安宣化萬全寶坻豐潤三河諸縣爲例執玉奏言此外所在皆有如首州武邱
村孔口莊趙州馬圈村糧有在贊皇者蔚縣夾道溝細賢莊糧有在宣化者宣
化井頭莊糧有在西甯者官苦追呼民勞跋涉凡地在此處糧寄彼處皆令從
地所在糧隨產轉此收彼除不使有交錯之病亦無庸存代徵之名經界各正

田賦悉清直隸驛馬一每歲雜支大率至十兩執玉奏定馬一每歲雜支三兩六錢昌平延慶宣化諸驛事煩撥僻地馬協濟而牧養仍責原驛執玉奏請改隸受協州縣牧養皆下部議行直隸耗羨歸公自雍正三年始部議元二年耗羨在三年補納者州縣充公用仍當追償荆文安等七州縣民借倉穀逋米二萬一千石穀一萬六千石各有奇部議責州縣追償執玉言元二年耗羨在未著令歸公以前前督臣許州縣充公用今欲追償是爲小費而失大言又言倉穀民欠歷年已久人產胥絕今欲追償此數十年官州縣者無慮百數悉逮其子孫而加以追比於情可憫上並加執玉議寬之九年以病甚乞解任許之十年病少瘳命領刑部尙書十一年春復命署直隸總督力辭上勉之行三月卒於官賜祭葬執玉重民事每請從寬大疏入輒報可執玉嘗曰吾才拙政事不如人可自力者勤耳勤必自儉始養廉歲用十三四餘歸之司庫

楊永斌字壽廷雲南昆明人康熙三十八年舉人以知縣發廣西補臨桂知縣以廉能聞遭喪去服除授直隸阜平知縣署平山調大城皆有惠政以捕治內

監陳永忠未即獲奪官大城民乞巡撫疏留會世宗即位知永斌賢許復官邊
涿州知州三年特諭永斌才守俱優授貴州威甯知府威甯界滇蜀諸土司虐
使其衆時出掠境外烏蒙祿萬鍾鎮雄隴慶侯尤強悍永斌被檄定界單騎入
諭其渠陰使人僞爲商賈分道圖地形鄂爾泰督雲貴永斌以圖上且曰二酋
不懲終爲邊患萬鍾幼諸土司未附今四川總督劾萬鍾不職請發兵壓境召
萬鍾出就質不出以兵入烏蒙平鎮雄勢孤亦且降鄂爾泰從之召萬鍾不至
令游擊哈元生與永斌督兵入萬鍾走鎮遠與慶侯同詣四川降凡三十三日
而事定米貼土婦陸氏爲亂鄂爾泰遣兵討之永斌語元生曰賊以冕山巴補
爲後路事急則渡金沙江而逸以重兵扼其前奇兵越江攻之賊可殲也元生
用其策克米貼鄂爾泰疏薦永斌可大用擢貴東道旋調糧驛道署按察使朝
議加稅軍田畝五錢永斌議曰軍田糧以屯租爲準已數倍於民田且今轉相
授受與民田交易無異名爲軍屯實皆民產而畝稅之是重科也民必不服當
多事之秋增剝膚之患驅之爲亂耳鄂爾泰以聞事乃寢七年遷湖南布政使

湖南方議清察軍田計畝未定永斌援貴州議以請亦得免九年調廣東十年春命署巡撫是秋員除廣東生齒繁民不動稼穡米值高永斌飭諸州縣勸墾高亢不宜禾令藝豆麥諸山坡麓栽所宜木又以惠潮兩府民最悍招墾官田租入充粵秀書院膏火奏聞嘉獎命勘明墾地畝數尋又奏言勘明可墾地六千八百餘頃此外或山深箬密或夾沙帶鹵體察民情恐墾地薄收糧賦無出臣思墾田產數雖少若多墾數十萬畝年豐可得數十萬石即歉歲亦必稍有所獲事益於民察通省糧額新甯斥鹵輕則畝徵銀四釐有奇米四合有奇擬請凡承墾磽瘠之地概準此例十年起科下部議行於是墾田至百十八萬餘畝乾隆元年兼署兩廣總督上命除落地稅因請併免漁課埠稅革粵海關贏餘陋例未盡汰者上悉從之永斌在廣東數年坦懷虛已淬厲諸將吏獲劇盜余覩陳美倫數十輩置之法收曲江乳源諸峒犴歸化西洋佔舶互市至者悉令寄棹澳門不得泊會城下粵民頌其績二年調湖北兼署湖廣總督令嚴保甲繕城堡課農桑實社倉興學校諸政畢舉未幾調江蘇按行奉賢南匯上海

寶山四縣海塘以築塘取土成渠塘根浸損議於塘內開河南接華亭連河北
達寶山高橋又察華亭金山嘴倪家路寶山楊家嘴地當衝要議視地所宜或
增築石壩或就舊塘加築寬厚或改築石塘又請於寶山建海神廟並從之三
年以老病乞休召詣京師署禮部侍郎尋授吏部四年致仕五年卒孫澁廢生
初授主事官至江蘇按察使

論曰其倬宗仁毓珣皆聖祖所擢用不著勤勩世宗畀以兼圻忠誠靡懈恩禮
始終宜矣倬度居官不擾民執玉永斌尤勤勩施惠文乾宗錫能濟其美世宗
治尙明肅諸臣皆以開敏精勤稱上指爲政持大體與夫急功近名流於谿刻
重爲世詬病者固大異矣

清史稿

列傳八十

李紱

蔡挺

謝濟世

陳華

李紱字巨來江西臨川人少孤貧好學讀書經目成誦康熙四十八年成進士改庶吉士散館授編修累遷侍講學士五十九年擢內閣學士尋遷左副都御史仍兼學士六十年充會試副考官出榜日黃霧風霾上語大學士等曰此榜或有亂臣賊子否亦當有讀書積學之士不得中式怨氣所致命磨勘試卷劣者停殿試又賜滿洲舉人留保直隸舉人王蘭生進士下第舉子羣聚紱門投瓦石喧闐御史舒庫疏劾下部議責紱不奏奪官發永定河工效力雍正元年特命復官署吏部侍郎赴山東催漕尋授兵部侍郎上令截留湖南等省漕糧於天津收貯旋又命估價出糶二年四月授廣西巡撫奏言廣西賀縣大金蕉木二山產礦砂五十里外爲廣東梅峒汛又數里爲宿塘寨礦徒盤據時時竊發臣方擬嚴禁聞總督孔毓珣條陳開採因而中止將來或恐滋事毓珣奏

同時至廷議寢其事上命以諭毓珣者示絨令協力禁止絨疏陳練兵列舉嚴賞罰演陳法習用銷礮豫備帳房鑼鍋諸事上嘉其留心武備康熙中巡撫陳元龍奏請開捐都計收穀百十七萬石有奇石折銀一兩一錢而發州縣買穀石止三錢不足以糴至絨上官尙虧四萬餘石絨奏請限一月補足會提督韓良輔條奏墾荒下絨議絨請以桂林柳州梧州南甯四府收貯捐穀動支爲開墾費上曰朕觀絨意不過借開墾以銷捐穀當時陳元龍等首尾不清朕知之甚詳應令元龍等往廣西料理並諭絨詳察毋隱諱瞻徇自承虧空尋絨奏察出督撫司道府廳分得羨餘銀八十二萬有奇勒限分償上嘉絨秉公執正絨在吏部時年夔堯子富等捐造營房下部議絨不肯從優爲夔堯所嫉及上命天津截漕估糶盈餘銀五千交守道桑成鼎貯庫絨至廣西成鼎使齎以界絨絨具摺送直隸巡撫李維鈞會奏維鈞置不上絨乃奏聞先是夔堯朝京師入對舉此訐絨謂絨乾沒上以問維鈞維鈞言絨取數百金治裝餘尙貯庫絨奏至上謂維鈞與夔堯比欲陷絨諭獎絨命留充公川三年六月絨奏言太平思

恩府界流言安南內亂有潘騰龍者自言爲莫姓後其黨黃托勢陳亂彈等煽誘爲亂嚴飭將吏捕治上諭曰封疆之內宜整理振作至於安邊柔遠最忌貪利圖功當慎之又慎九月奏犛犛頑梗修仁十排天河三曠爲尤甚常出劫掠臣遣吏入十排捕得其渠三曠阻萬山中所種田在隘外臣發兵守隘斷其收穫其渠今亦出自歸上獎其辦理得宜旋授直隸總督四年絀入覲初左都御史蔡珽薦起其故吏知縣黃振國授河南信陽知州忤巡撫田文鏡文鏡取吏嚴尤惡科目劾振國貪劣絀過河南詰文鏡胡爲有意踐踐士人入對因極言文鏡貪虐且謂文鏡所劾屬吏如振國及邵言綸汪誠皆枉振國已死獄中文鏡因絀語先密疏聞謂絀與振國同年袒護絀疏辨上不直絀而振國實未死逮至京師上更謂絀妄語良輔奏雲南廣西所屬土司與貴州接壤者皆改歸貴州安籠鎮節制命絀往與雲貴總督高其倬會勘疏請循舊制從之絀還直隸時上譴責諸弟允禩允禩等更允禩名塞思黑幽諸西密復移置保定命胡什禮監送絀語胡什禮塞思黑至當便宜行事胡什禮以聞上以爲不可命諭

紱紱奏初無此語塞思黑至保定未幾紱以病聞尋遂死是冬御史謝濟世劾文銳貪虐仍及誣劾振國等上奪濟世官下大學士九卿會鞫成濟世阿爾泰軍前上以濟世奏與紱語同疑紱與爲黨召紱授工部侍郎紱在廣西捕亂苗莫東旺置天河縣獄未竟紱移督直隸去久之蠻獠集衆破獄劫東旺去五年春良輔署廣西巡撫奏聞上以詰紱下部察議會都察院奏廣西州判程且詣院訴上司羅文剛掠村落抗官兵上責紱與繼任巡撫甘汝來遂巡貽害命紱與汝來至廣西捕治不獲當重譴紱至廣西東旺聞而自歸文剛亦捕得直隸總督宜兆熊劾知府曾逢聖知縣王游虧空錢糧上以逢聖游皆紱所薦命詰紱戶部議覆紱在直隸奏報懷來倉圯穀爲小民竊食當下直隸總督詳察上曰穀至六千餘石豈能竊食至盡明係紱市恩爲縣吏脫罪當責紱償補以成其市恩兆熊又劾知縣李先枝私派累民上以先枝亦紱所薦責紱欺罔奪官下刑部議政大臣等會鞫紱罪凡二十一事當斬上諭曰紱既知悔過情詞懇切且其學問尙優命免死繫修八旗通志効力七年又以順承郡王錫保奏

濟世在阿爾泰供言劾文鏡實受絀及珽指下絀等刑部會曾靜張熙獄起上召王大臣宣諭並命絀入諭曰朕在藩邸初不知珽絀姓名有馬爾齊哈者能醫朕問更有能醫者否以珽對召珽來見珽謂不當與諸王往來辭不至以是朕重之年羹堯來京亟稱珽朕告以嘗招之不來羹堯以語珽珽復辭不至以是朕益重之及出爲四川巡撫詣熱河行在始與相見爲朕言李絀朕知絀自此始既即位延訪人才起絀原官旋自侍郎出撫廣西至爲直隸總督徇私廢公沽名邀譽致吏治廢弛人心玩愒又如塞思黑自西大通調回令暫住保定未幾絀奏言造病不數日卽死姦黨遂謂朕授意於絀使之戕害今絀在此試問朕嘗授意否乎塞思黑罪本無可赦豈料其遽死絀不將其病死明白於衆致生疑議絀能辭其過乎田文鏡公忠而絀與珽極力陷害使濟世誣劾必欲遂其私怨此風何可長也復下絀刑部嚴鞫獄上請治罪上寬之高宗卽位賜侍郎銜管戶部三庫尋授戶部侍郎乾隆元年方開博學鴻辭科絀所舉已衆又以所知屬副都御史孫國璽薦舉事聞上上詰絀絀自承妄言上謂絀乃妄

舉非止妄言避重就輕降授詹事二年以母憂歸六年補光祿寺卿遷內閣學士絳偉岸自喜其論學大指謂朱子道問學陸九淵尊德性不可偏廢上聞而疑之八年以病致仕入辭上問有欲所陳否絳以慎終如始對賜詩獎及之十五年卒孫友棠乾隆十年進士自編修累遷至工部侍郎新昌舉人王錫侯撰字貫坐悖逆死友棠有題詩並奪官賜三品卿銜卒

蔡珽字若璞漢軍正白旗人雲貴總督毓榮子康熙二十六年進士改庶吉士散館授檢討洊擢少詹事進翰林院掌院學士兼禮部侍郎時世宗在潛邸聞其能醫欲見之珽謝不往六十年四川巡撫年羹堯入覲世宗命達意仍堅辭六十一年羹堯授川陝總督以珽代爲四川巡撫覲聖祖熱河行在世宗方扈從乃詣謁而去雍正二年羹堯請川陝開採鼓鑄珽疏言四川不產鉛開採非便羹堯劾珽阻撓下部議當奪官珽辱重慶知府蔣興仁憤自殺珽以病卒聞羹堯劾之上詰責再三始自承下部議擬斬昭逮至京師召入見具言羹堯貪暴及所以抗拒羹堯狀上諭曰珽罪應如律然劾之者羹堯人將謂朕以羹堯

故殺珽是夔堯得操威福柄也其免珽罪特授左都御史兼正白旗漢軍都統
尋進兵部尙書仍兼左都御史會夔堯得罪直隸總督李維鈞隱其財產上命
珽偕內大臣馬爾賽往按得實奪維鈞官以珽署總督直隸方被水議蠲賑復
發帑修河間靜海諸城俾饑民就備受食珽奏言省會米貴令按察使浦文焯
至天津運截留漕米二萬石以萬石運保定平糶留萬石賑經過諸地上如所
請敕再運通倉米十萬石往天津加賑一月珽奏請察地方官侵冒懲省役虛
報訪給棍挾制貧民戶給印券每村給村名紙旗以次給領賑滿續修城工卽
以賑時所給印券交驗受備從之調補吏部尙書仍兼領兵部都察院及都統
事四年以珽所領事多先後解左都御史都統吏部尙書專任兵部尙書旋以
在直隸時徇庇昌平營參將楊雲棟坐奪官上命降授奉天府尹初上以岳鍾
琪代年夔堯爲川陝總督珽入對言鍾琪叵測鍾琪入覲過保定珽方署直隸
總督造蜚語冀以撼鍾琪事聞上嚴旨詰責五年召回京按訊上閱夔堯幕客
舉人汪景祺所著書載珽撫四川時得夔州府知府程如絲賄保治行第一如

絲守夔州蠶私鹽而捕湖廣民竄私鹽者得輒殺之爲羹堯劾能珽入對言其
寃上命免如絲罪且擢爲四川按察使至是上頗疑景祺言會巡撫馬會伯劾
如絲營私網利疏至命侍郎黃炳如四川按其事以珽借炳還奏事實下法司
彙讞尋議珽挾詐懷私受夔關稅銀富順縣鹽規冒銷庫帑並得如絲銀六萬
六千金九百緡毀鍾琪交結查嗣庭凡十八事應斬決妻子入辛者庫財產沒
入官命改斬監候六年管理正白旗信郡王德昭又奏珽家藏硃批奏摺三十
件未繳進大不敬應立斬詔逮至京師初珽故吏知縣黃振國坐事奪官珽薦
起河南信陽知州巡撫田文鏡劾貪劣不法李紱自廣西巡撫遷直隸總督入
對力陳振國無罪御史謝濟世劾文鏡亦及之言與紱合上疑紱與濟世爲黨
召紱還京師成濟世及珽至諭暴珽等結黨欺罔傾陷文鏡諸罪狀命斬振國
珽仍改斬監候下獄十三年高宗即位赦免乾隆八年卒

謝濟世字石霖廣西全州人康熙四十七年舉鄉試第一五十一年成進士改
庶吉士授檢討雍正四年考選浙江道御史未浹旬疏劾河南巡撫田文鏡營

私負國貪虐不法列舉十罪上方倚文銳意不憚命還濟世奏濟世堅持不可
上諭曰文銳秉公持正實心治事爲督撫中所罕見者貪贓壞法朕保其必無
而濟世於督撫中獨劾文銳朕不知其何心朕訓誡科道至再至三誠以科道
無私方能彈劾人之有私者若自恃爲言官聽人指使顛倒是非擾亂國政爲
國法所不容朕豈不知誅戮諫官史書所戒然誅戮諫官之過小釀成人心世
道之害大禮義不愆何恤於人言朕豈恤此區區小節哉奪濟世官下大學士
九卿科道會鞠濟世辨甚力刑部尙書勸杜訥問指使何人對曰孔孟問何故
曰讀孔孟書當忠諫見姦弗擊非忠也讞上以濟世所言風聞無據顯係聽人
指使要結朋黨擬斬文銳劾屬吏黃振國邵言綸汪誠等李紱訟言其枉並謂
河南諸吏張球最劣文銳縱非糾入對具爲上言之上先入文銳言不直紱而
濟世罪狀文銳又及枉振國言綸誠庇球諸事上召大學士九卿科道等入見
舉前事謂濟世言與紱奏一一昭合今詰濟世劾文銳諸事濟世皆茫無憑據
俯首無詞是其受人指使情弊顯見命奪濟世官往阿爾泰軍前効力贖罪濟

世至軍大將軍平郡王福彭頗敬禮之濟世講學著書不稍輟七年振武將軍順承郡王錫保以濟世撰古本大學注毀謗程朱疏劾請治罪上擣見賢而不能舉兩節注有拒諫飾非拂人之性語責濟世怨望謗訕下九卿翰詹科道議罪有陸生相者白舉人選授江南吳縣知縣引見上有所詰問不能對改授工部主事復引見上見其傲慢以其廣西人疑與濟世爲黨命奪官發軍前令與濟世同効力生相撰通鑑論十七篇錫保以爲非議時政別疏論劾上並下九卿翰詹科道議罪尋議濟世詆訕怨望怙惡不悛生相憤激猖狂悖逆恣肆皆於軍前正法上密諭錫保誅生相縛濟世使視生相既就刑宣旨釋之濟世在成九年高宗卽位詔開言路爲建勳將軍欽拜草奏請責成科道嚴不言之罰恕妄言之罪上嘉納焉旋召濟世還京師復補江南道御史濟世以所撰大學注中庸疏進上略言大學注中九卿科道所議諷刺三語臣已改刪惟分章釋義遵古本不遵程朱習舉業者有成規講道學者無厲禁千慮一得乞舍其瑕而取其瑜得旨嚴飭還其書二年濟世疏曰臣今所言者有二一曰去邪勿疑

一日出令勿貳有罪而復用如程元章哈元生者輿論猶有想詞至於隆昇國人皆曰不可猶未罷斥不惟不能斥隆昇而已如王士俊以加賦爲舉荒隸毒中州又請爲田文鏡立賢良祠皇上旣深惡之乃調回而仍用速勘而復赦乃者清問及之議者謂將用爲藩臬藩臬總一省刑名錢穀豈辜恩負罪之督撫所能勝任乎易言渙汗禮稱綸綍信而已矣今則元年諭旨二年即廢格或改易矣特諭停止在任守制近日督撫又漸次請行天下之大何患無才記曰金革無辟又曰君子不奪人之親安用此食祿忘親者爲哉特諭監生准入場不准考職昨世宗升册恩詔監生仍准考職考職者入仕之門旣准捐監又准考職復開捐例之張本也即止給虛銜不准實授而後命前命相違亦不宜如此臣聞不退不遠大學所護世間君子少小人多已敗露者不行放流未敗露者益無忌憚若發號施令小人得以搖奪君子無所適從國事未有不隳者也三年疏言母蔣年七十一行動艱難耳目昏聩臣欲歸養則貧不能供甘旨欲迎養則老不能任舟車欲歸省則往返動經半年在家不過數月年逢又別旣別

難逢慈母之涕淚轉添游子之方寸終亂臣才不稱道府例又從無自請遷轉乞敕部以州縣降授湖南廣東量子近地臣得母子聚首無任哀懇上特授濟世湖南糧儲道八年濟世聞衡陽知縣李澎徵賦縱丁役索浮費易服僞爲鄉民納賦者以往察得實善化知縣樊德貽與同弊濟世詳劾巡撫許容庇德貽等以濟世蕩檢踰閑列狀入告上命解任交總督孫嘉淦會鞫濟世捕衡陽丁役下長沙知府張琳讞得徵收浮費有據容令岳常澧道倉德代濟世布政使張璨附容指貽書倉德令更易長沙府詳牒倉德初官給事中嘗劾濟世奏事失儀至是不直璨所爲發其書上嘉淦及漕運總督顧琮嘉淦庇容寢其事諭倉德委曲善處琮咨都察院奏聞御史胡定糾容挾私誣劾探湖南民謠斥容與璨等朋謀傾濟世上命侍郎阿里袞加湖南會嘉淦按治而倉德以嘉淦寢其事復揭都察院奏聞上責嘉淦草率扶同召還京師解容璨任奪琳德貽澎官阿里袞尋奏濟世被誣劾請復官容璨及按察使王玠皆坐奪官上命并罷嘉淦而獎倉德及定調濟世驛鹽道將溥代爲巡撫曠濟世密進所著書斥爲

離經畔道上曰朕不以語言文字罪人置不問未幾復言其老病乃命休致歸
家居十二年卒年六十有八陳學海字志澄江西永豐人康熙五十二年進士
改庶吉士與濟世友授山東恩縣知縣行取刑部主事遷員外郎文鏡劾振國
等上遣侍郎海壽史貽直往按請以學海從得文鏡欺罔狀將以實入告繼乃
反之學海爭不得使還擢御史嘗以語濟世濟世用是劾文鏡既譴學海不自
安次年以病告都察院劾僞病並及與濟世交關狀奪官命與濟世同効力軍
前雍正七年召還授檢討十一年卒

論曰文鏡與鄂爾泰李衛同爲世宗所激賞高宗謂三人者文鏡爲最下允
戩文鏡馭屬吏苛急待士尤虐絀固以好士得時譽宜其惡之深而所爭以爲
枉者爲珽所薦吏濟世又繼以爲言世宗疑珽使絀入告不納又嗾濟世露章
論劾互相結務欲傾文鏡獄遂不可解然終未即誅死高宗嗣服諸人皆得漸
祓絀復起濟世亦見用孰謂世宗嚴不肯戮諫臣固明言之矣

清史稿

列傳八十一

李衛

田文鏡

憲德

諾岷

陳時夏

王士俊

李衛字又玠江南銅山人入資爲員外郎補兵部康熙五十八年遷戶部郎中世宗即位授直隸驛傳道未赴改雲南鹽驛道雍正二年就遷布政使命仍管鹽務三年擢浙江巡撫四年命兼理兩浙鹽政疏言浙江戶口繁多米不敷食請撥鹽政歸公銀十萬委員赴四川採運減糶款歸司庫有餘以修理城垣衛整理鹽政疏言諸場有給丁灘蕩者以丁入地計畝徵收無給丁灘蕩者暫令各丁如舊輸納又言浙省私販出沒以海甯長安鎮爲適中孔道請設兵巡隘又言江南蘇松常鎮四府例食浙鹽鎮江接壤淮鹽偷渡請敕常鎮道及京口將軍標副將城守參將等督飭將吏水陸巡緝五年奏修海甯海鹽蕭山錢塘仁和諸縣境海塘尋授浙江總督管巡撫事六年奏言江浙界上盜賊藏匿浙

省究出從盜咨江南震澤縣捕治竟以替身起解案中諸盜江南督臣范時繹留以待讞今察出有舉人金士吉等徇庇當請褫奪並提江南所留諸盜窮究黨羽剪除巢穴得旨嘉獎溫台接壤瀕海有玉環山港粵平衍土性肥饒前總督滿保因地隔海禁民開墾衛遣吏按行其地奏請設同知置水陸營汛招民墾田於本年起科設隘煎鹽官爲收賣漁舟入海給牌察驗魚鹽徵稅充諸項公用衛經畫浙東諸縣水利鄞縣大嵩港溉田數萬畝歲久淤淺衛令疏濬築塘設閘開支河溉田鎮海靈巖大邱二鄉有浦口通海舊有閘已圯衛令修築定海多曠土衛令察丈清理上虞瀕海潮汐沒民田衛爲奏請除額縣有夏蓋湖積淤多已成田衛令察丈許民承業升科上以江南多盜時繹及巡撫陳時夏非戢盜之才命蘇松等七府五州盜案令衛兼領將吏聽節制時議增築松江海塘並以舊塘改土爲石上復以時繹未能董理令衛勸議衛詣勘奏言松江海塘已築二千四百餘丈未築者當令仿倣海鹽舊塘石塘後附築土塘宜一例高厚歲派員修治上從之仍令衛會時繹時夏董理上以衛留心營務

江南軍政舉劾復命衛會同考核尋遣侍郎彭維新等如江南清察諸州縣積欠錢糧亦令衛與聞七年加兵部尙書入覲遭母喪命回任守制尋復加太子少傅江甯有張雲如者以符呪惑民衛遣副察得其黨甘鳳池陸同庵蔡思濟范龍友等私相煽誘狀八年衛令游擊馬空北往捕時繹故與雲如往還與按察使馬世烜庇不遣賄空北還稟衛衛疏劾上遣尙書李永升會鞠時繹奪官世烜空北皆坐譴雲如等論斬九年疏請改定蘇州府營制衛在浙江五年蒞政開敏令行禁止上以查嗣庭汪景祺之獄停浙江人鄉會試衛以文告嚴督逾年與觀風整俗使王國棟疏言兩浙士子感恩悔過士風丕變乃命照舊鄉會試上督責各直省清釐倉庫虧空錢糧逋欠衛召屬吏諭意簿書期會吏事皆中程民間亦無擾十年召署刑部尙書授直隸總督命提督以下並受節制十一年疏劾步軍統領鄂爾奇壞法營私紊制擾民上爲奪鄂爾奇官命果親王及侍郎莽鵠立海望按治得實請罪鄂爾奇上以鄂爾奇爲鄂爾泰弟曲宥之獎衛命議敘乾隆元年命兼管直隸總河裁營田觀察使敕衛覈議衛請以

營田交諸州縣收管分轄通永霜易天津清河大名五道統率經理下部如所
議二年疏發誠親王府護衛庫克與安州民爭淤池赴州屬託上命治庫克罪
嘉衛執法秉公賜四團龍補服三年疏劾總河朱藻貪劣藻弟衛挾制地方官
干預賑事上命尙書訥親孫嘉淦按治奪藻官並罪衛如律衛在直隸六年蒞
政如在浙江時屢奏請審正府縣疆界改定管汛增置將吏衛尤長於治盜盜
匿山澤間調得其蹤跡遣將吏捕治必盡得乃至以是所部乃無盜病作乞解
任遣御醫診視卒賜祭葬諡敏達世宗在藩邸知衛才眷遇至厚然察衛尙氣
屢教誡之其在雲南或有餽於衛衛又令製欵用牌入儀仗上諭之曰聞汝恃
能放縱操守亦不純川馬骨董俱當檢點又製欵用牌是不可以已乎爾其謹
慎毋忽衛奏言受恩重當不避嫌怨上又諭之曰不避嫌怨與使氣凌人驕慢
無禮判然兩途汝宜勤修涵養勉爲全人方不負知遇及赴浙江時河決朱家
海上命中途與河道總督齊蘇勒議施工衛見齊蘇勒決口已合龍議頗不相
協衛銜問答語以聞會衛族弟懷謹等居鄉放縱衛令淮徐道捕送拘禁族人

騰謗而疏言臣開罪范時繆又與齊蘇勒不無芥蒂皆臣本籍大吏恐因家事心迹難明上諭之曰時繆不足論齊蘇勒與有芥蒂或汝禮貌疏慢所致咎不在齊蘇勒凡審事辨公私最爲不易向日於鄰里鄉黨間先存嫌怨則又當別論朕每言公中私私中公樞機正在於此及在直隸上復諭之曰近有人謂卿任性使氣動輒肆詈丈夫立身行己此等小節不能操持尙何進德修業之可期當時自檢點從容涵養高宗南巡見西湖花神廟衛自範象並及其妻妾號湖山神位諭曰衛仰借皇考恩眷任性驕縱初非公正純臣託名立廟甚爲可異命撤象燬之

田文鏡漢軍正黃旗人康熙二十二年以監生授福建長樂縣丞遷山西密鄉知縣再遷直隸易州知州內擢吏部員外郎歷郎中授御史五十五年命巡視長蘆鹽政疏言長蘆鹽引缺額五萬七千餘道商人願先輸課增復原引自五十六年爲始在長清等縣連行得旨加引雖可增課恐於商無益下九卿議行山東巡撫覈定題覆如所議尋擢內閣侍讀學士雍正元年命祭告華嶽是歲

山西災年災堯入覲請賑上詰巡撫德音德音無災及文鏡還入對備言山西荒歉狀上嘉其直言無隱令往山西賑平定等諸州縣即命署山西布政使文鏡故有吏才清整積愆剔除宿弊吏治爲一新自是遂受世宗眷遇二年調河南旋命署巡撫疏請以陳許禹鄭陝光六州升直隸州尋命與除文鏡希上指以嚴厲刻深爲治督諸州縣清逋賦闢荒田期會促迫諸州縣稍不中程譴謫立至尤惡科目儒緩小忤意輒劾罷疏劾知州黃振國知縣汪誠卻言綸關隲等上遣侍郎海壽史貽直往按譴黜如文鏡奏四年李紱自廣西巡撫召授直隸總督道開封文鏡出遊紱責文鏡不常有意蹂躪讀書人文鏡密以聞并謂紱與振國爲同歲生將爲振國報復紱入對言振國誠言綸被論皆冤抑知縣張球居官最劣文鏡反縱不糾上先入文鏡言置不問球先以盜案下部議文鏡引咎論劾是冬御史謝濟世劾文鏡營私負國貪虐不法凡十事仍及枉振國言綸誠庇球諸事與紱言悉合上謂濟世與紱爲黨有意傾文鏡下詔嚴詰奪濟世官遣從軍振國誠論死戍言綸隲於邊振國故蔡珽屬吏旣罷官以

珽薦復起及珽得罪上益責絀珽濟世勾結黨援擾國政誣大臣命斬振國文鏡疏請以河南丁銀均入地糧紳衿富戶不分等則一例輸將以雍正五年始部議從之五年疏言黃河盛漲險工迭出宜暫用民力每歲夏至後將距隄一二里內村莊按戶出夫工急搶護事竟則散若非計日可竣者按名給工食下部議行尋授河南總督加兵部尚書文鏡初隸正藍旗命擢入正黃旗六年上褒文鏡公正廉明授河南山東總督諭謂此特因人設官不爲定例文鏡疏言兩省交界地易藏匪類捕役越界奸徒奪犯每因拒劫致成人命彼界有司仍復徇庇請嗣後越界捕盜有縱奪徇庇者許本省督撫移咨會劾上從之文鏡先以河南漕船在衛輝水次受兌道經直隸大名屬溶滑內黃三縣隔省呼應不靈請以三縣改歸河南既又以河南徵漕舊例河北三府起運本色餘皆徵折在三府採買偏重累民請以儀封考城及新改歸河南溶滑內黃等五縣增運本色距水次最遠靈寶閿鄉二縣減辦米數歸五縣徵輸南陽汝甯諸府光汝諸州永甯嵩盧氏諸縣皆以路遠停運分撥五縣協濟按道路遠近石加五

分至二錢三分各有差又疏言山東倉庫虧空那新掩舊請如河南交代例知府直隸州離任所轄州縣倉庫令接任官稽察如有虧空責償其半方得赴新任道員離任所轄府直隸州倉庫亦視此例又疏言山東錢糧積虧二百餘萬雍正六年錢糧應屆完全之限完不及五分由於火耗太重私派太多請敕山東巡撫布政使協同臣清察期以半年參追禁革毋瞻徇毋容隱上皆用其議七年請設青州滿洲駐防兵屯府北東陽城址下議政王大臣議行尋加太子太保疏請以高唐濮東平莒四州升直隸州改濟甯直隸州降隸兗州府旋命兼北河總督是歲山東水災河南亦被水上命蠲免錢糧文鏡奏今年河南被水州縣收成雖不等實未成災士民踴躍輸將特恩蠲免錢糧請仍照額完兌部議應如所請上仍命文鏡確察歉收分數照例蠲免現兌正糧作下年正供九年諭曰上年山東有水患河南亦有數縣被水朕以旧文鏡自能料理未別遣員治賑近開祥符封邱等州縣民有鬻子女者文鏡年老多病爲屬吏欺誑不能撫綏安集而但禁其鬻子女是絕其生路也豈爲民父母者所忍言乎並

令侍郎王國棟如河南治賑文鏡以病乞休命解任還京師病痊仍命回任十年復以病乞休允之旋卒賜祭葬諡端肅命河南省城立專祠又以河道總督王士俊疏請祀河南賢良祠高宗即位尙書史貽直奏言士俊督開墾開捐輸累民滋甚上諭曰河南白田文鏡爲督撫苛刻搜求屬吏競爲剝削河南民重受其困即如前年匿災不報百姓流離蒙皇考嚴飭遣官賑恤始得安全此中外所共知者並命解士俊任語詳士俊傳乾隆五年河南巡撫雅爾圖奏河南民怨田文鏡不當入河南賢良祠上諭曰鄂爾泰田文鏡李衛皆皇考所最稱許者其實文鏡不及衛衛又不及鄂爾泰而彼時三人素不相合雅爾圖見朕以衛祀賢良借文鏡之應撤明衛之不應入當日王士俊奏請奉皇考允行今若撤出是翻前案矣寢雅爾圖奏不行

憲德西魯特氏尙書明安達禮孫也父善官頭等侍衛憲德初以廕生授理藩院主事再遷刑部郎中雍正四年授湖北按察使時布政使張聖弼坐虧空論罪憲德上官聖弼詣謁憲德下諸獄疏聞上獎其能執法尋就遷巡撫五年調

四川張獻忠之亂四川民幾盡亂初定吳三桂叛其將吳之茂王屏藩等入川與我帥久相持民受其害土曠人稀康熙間休養久墾闢漸廣經界未正田糧多不實巡撫馬會伯奏請清丈以調湖北未行上以諮憲德憲德奏四川昔年人民稀少田地荒蕪及至底定歸復祖業從未經勘丈故多所隱匿歷年既久人丁繁衍奸猾之徒以界畔無據遂相爭訟川省詞訟爲田土者十居七八亦非勘丈無以判其曲直上復諮川陝總督岳鍾琪奏與憲德略同乃下九卿議行遣給事中高維新馬維翰御史吳鳴虞吳濤如四川會同松茂建昌川東永甯四道分往諸州縣丈量維新永甯道維翰建昌道鳴虞松茂道濤川東道鳴虞先期示復明舊額憲德阻止之他道凡民間屋基墳墓界埂水溝園林皆不入勘丈鳴虞獨不然民驚擾又需索丈費憲德疏請能鳴虞維新事先竟上令繪勘松茂道濤治事迂鈍維翰事亦竟憲德請以佐濤萬縣民愬濤丈量不公懸旗聚衆塾江忠州民亦以爲言維新松茂道事又竟憲德又疏請能濤以維新維翰分勘川東道七年十一月通省勘丈畢舊冊載上中下田地都計二十

三萬餘頃丈得四十四萬餘頃增出殆及半而諸土司地納糧以石計亦次第具報視原額加增戶部奏請視丈出田地照則徵糧上諭曰從前隱瞞科則止據實吏定毋追咎至額糧稍重諸州縣卽比照就近適中科則核減俾紓民力憲德奏各屬徵糧科則輕重懸殊原重通江諸縣願請減輕原輕郫灌溫江三縣亦據實呈請願增臣等擬原重田地令與接壤地方相等比照科算原輕田地亦應按則加增不致小民偏枯委曲於是成都華陽新津郫溫江長壽諸縣俱增上則灌縣增中則綿州緞甯改分上中下三則江油增下則瀘川屏山雅州名山榮經蘆山義眉夾江通江賦偏重均視鄰縣量減巴縣賦最輕上田不及一分以地瘠不增他州縣皆仍舊則其有丈見田少糧多經原戶聲請皆予開除上命招他省民入川開墾丈增田畝憲德奏請以丈增地畝分科則編字號計數均分戶給水田三十畝或旱地五十畝有餘丁增水田十五畝或旱地二十五畝丁多不能養贍臨時酌增或有多餘三五畝亦一併給墾奇畝不成邱段者酌量安置給以照票並牛種口糧分年升科皆下部如所議行八年墊

江忠州民楊成勳等羣聚爲亂署川陝總督查郎阿遣兵捕治成勳自經死獲其徒陳文魁楊成祿等得所爲怨自言禍起戊申年奉旨清文科派需索累民查郎阿疏聞諭曰四川清丈之議始於馬會伯而成於憲德朕慎選科臣前往料理誠以剔除積弊安插善良並非爲加增賦稅而起勘丈造冊各官供應皆令動帑支給不使幾微煩擾我民今年事竟憲德具本代川民謝恩謂通省士民咸稱清理疆界使強無兼併弱無屈抑又將田不數糧之戶悉予開除疆界既已分明額賦尤爲公溥朕以爲經理得宜矣豈意奸民嘯聚竟以清丈苛虐爲言怨白稱奉旨清丈豈憲德等但以清丈稱爲奉旨於前者奏請未曉諭於衆耶陳文魁訴狀並稱頌川省上司是必憲德等沽譽干名何不將朕德意宣播而乃蒙混含糊使奸民得以藉口耶憲德既稱通省士民歡呼感戴何以尙有陳文魁等暗結邪黨肆行誹謗可見平日化導未周董戒不力令憲德將朕此旨刊布曉諭憲德撫四川七年屢請更定州縣疆界有所省置收天全土司改流設州並升雅州爲府隸焉憲德議開紫古鑛廠會兒斯堡生番入邊殺掠

商民上令封閉憲德以川省米貴請暫停商販逾年歲稔上令弛禁毋遏糶初
上官以四川驛鹽茶三政皆屬按察使兼領未足司稽覈請增設驛鹽道專司
其事從之及清丈事將竟奏言鹽茶積弊請令清查地畝科道諸員兼司搜查
上諭曰川省鹽茶既特設道員自有責成如不能勝任當予參劾別擇賢能鹽
茶積弊相沿已久應從容清理安可如此嚴急奏請搜查更屬謬妄汝諸事料
理過於促迫不肯實心任事於此奏畢見後當深戒十一年憲德奏鹽道曹源
鄒混發引日累商諭曰鹽課引務汝有督率之責曹源鄒果不法當列款糾參
若止改撥不當何難商酌更正今但請敕部察議將礙政視如無涉誠不知汝
何意朕甚鄙汝玷督撫統轄訓飭之任也尋召還京授工部尚書十二年調刑
部仍兼工部署滿洲正紅旗都統乾隆元年命赴秦陵督工五年卒子夢麟自
有傳

諾岷納喇氏滿洲正藍旗人先世居輝發祖恩國秦習漢書天聰八年舉人直
秘書院授禮部理事官洵擢尚書父那敏官鑲黃旗滿洲都統諾岷自筆帖式

授戶部主事再遷郎中雍正元年擢內閣學士授山西巡撫各直省徵賦正供外舊有耗羨數多寡無定州縣以此供上官給地方公用而私其餘上官亦往往藉公用檄州縣提解因以自私康熙間有議歸公者聖祖慮官俸薄有司失耗羨虐取於民地方公用無從取辦寢其議不行諾岷至山西值歲屢歉倉庫多虧空諾岷察諸州縣虧空尤甚者疏劾奪官離任勒追餘州縣通行調任互察倉庫並慮州縣不得其人請敕部選賢能官發山西補用二年諾岷疏請將通省一歲所得耗銀提存司庫以二十萬兩留補無著虧空餘分給各官養廉各官俸外復有養廉自此起布政使高成齡奏言直省錢糧向有耗羨百姓既以奉公即屬朝廷財賦臣愚以爲州縣耗羨銀兩自當提解司庫憑大吏酌量分給均得養廉且通省遇有不得已例外之費即以是支應至留補虧空撫臣諾岷先經奏明臣請敕下各直省督撫俱如諾岷所奏將通省一歲所得耗銀約計數目先行奏明歲終將給發養廉支應公費留補虧空各若干一一陳奏則不肖上司不得借名提解自使其私上命總理事務王大臣九卿集議議略

謂提解火耗非經常可久之道請先於山西試行上諭曰州縣火耗原非應有之項因通省公費各官養廉不得不取給於此朕非不願天下州縣洋毫不取於民而勢有所不能州縣徵收火耗分送上司州縣藉口而肆貪婪上司瞻徇而爲容隱此從來之積弊所當削除者也與其州縣存火耗以養上司何如上司撥火耗以養州縣至請先於山西試行此言尤非天下事惟有可行不可行兩端譬如治病漫以藥試之鮮有能愈者今以山西爲試朕不忍也提解火耗原一時權宜之計將來虧空清楚府庫充裕有司皆知自好各省火耗自漸輕以至於盡革此朕之深願各省能行者聽不行者亦不强也自後各直省督撫以次奏請視山西成例提解耗羨上以諾岷首發議諭獎其通權達變於國計民生均有裨益上屢飭各省督察有司耗羨既歸公不得巧立名目復有所取於民給養廉資公用尙有所餘當留備地方公事河南耗羨餘款最多特免地丁錢糧四十萬卽以所餘抵補上諭謂此項出自民間若公用充裕仍當加恩本地官民不令歸入公帑也三年諾岷以病乞假命回旗調理初貝子允禩以

罪徙西甯道出平定太監李大成毆諸生諾岷按讞以大成方病置未深究上責諾岷瞻徇命繼任巡撫伊都立覆讞罪大成奪諾岷官十二年卒

陳時夏字建長雲南元謀人康熙四十五年進士考授內閣中書三遷工部郎中考選廣西道御史雍正元年授河南開歸道仍帶御史銜尋奏河北連年歉收請發帑治賑蠲免錢糧上嘉允之二年遷湖北按察使以在開歸道任封邱生員罷考坐不能彈壓奪官三年授直隸正定知府四年遷長蘆鹽運使加布政使銜署江蘇巡撫疏陳蘇松水利請發帑興工命副都統李淑德原任山東巡撫陳世倌會勘議先濬婁江常熟福山塘昭文白茆河太倉七浦河上海嘉定吳淞江武進孟瀆德勝新河丹陽九曲河次第疏治時夏復疏言江南錢糧請視直隸河南正耗統解布政使督撫以下各給養廉地方公事用耗銀報銷從之上知時夏有老母命雲南督撫贈資斧護至蘇州復賜人蔭六年江蘇布政使張坦麟調山東時夏以坦麟任內錢糧未清疏請停赴新任坦麟亦奏時夏令新任布政使趙向奎勒捐交代上責時夏褊淺才識不足不能勝巡撫命

改署山東布政使即以坦麟署江蘇巡撫是時江蘇巡撫所屬七府五州自康熙五十一年至雍正四年積虧地丁錢糧至八百十三萬有奇巡撫張楷請分年帶徵及時夏至江蘇催迫促迫民艱於輸納事久未竟上命時夏留江蘇會辦虧空時夏請以舊欠均派新糧分年徵收上諭曰舊欠自有本人舍此不追而均派新糧是刁民因積欠而得利良民因先輸而倍徵從此人人效尤誰復輸供正賦且舊欠派入新糧必致舊欠未完新糧又欠時夏因朕留之在蘇乃欲藉此草率完結命暫停徵比交新任巡撫尹繼善清察上又遣侍郎彭維新等佐尹繼善察出積欠實一千萬有奇上命以其中侵蝕包攬四百數十萬分十年帶徵民欠五百數十萬分二十年帶徵並令視直隸河南諸省已行例每歲帶徵若干次年免正賦若干諭謂獨通賦使頑戶偏蒙其澤不若免新徵使衆民普受其惠也七年尹繼善劾時夏所舉知縣蔡益仁貪黷不職下部議降調八年以母憂歸十二年詣京師命以僉都御史銜授霸州營田觀察使奏文安大城兩縣界內修築橫隄請於隄東南尙家村建閘隄內濬河引子牙河水

澗田仍於北岸多用涵洞俾水得宣洩乾隆二年奏請用區田法選屬吏租民地試行皆從之授內閣學士三年卒

王士俊字灼三貫州平越人康熙六十年進士改庶吉士雍正元年上半年上特命以知州發河南待闕除許州田文鏡爲巡撫惡以科第起家者有意督過之士俊懼將及文鏡增贖地稅民不堪士俊具牒爭冀以是劾罷邀名布政楊文乾奇士俊曲護之三年文乾遷廣東巡撫奏以士俊從四年題授肇高廉羅道五年署巡撫阿克敦察士俊所轄黃江稅廠虧稅銀千餘疏劾上諭之曰王士俊尙有用小過猶可諒當嚴飭令改尋召士俊詣京師士俊發黃江廠庫官爲布政使官達索規禮阿克敦即令官達按鞫士俊請改員嚴訊阿克敦令按察使方願瑛會鞫士俊即以阿克敦官達方願瑛朋謀徇私揭吏部奏聞會文乾亦以他事劾阿克敦官達上命解官達願瑛任令總督孔毓珣及文乾會鞫並令士俊署布政使士俊行至曲江聞命還廣東上官會文乾卒上命傅泰署巡撫復遣通政使留保等如廣東會鞫阿克敦等皆坐譴六年實授廣東布政使九

年擢湖北巡撫十年文鏡解任還京師擢士俊河東總督兼河南巡撫十一年疏劾學政俞鴻圖納賄行私命侍郎陳樹萱按鞫得實鴻圖坐斬文鏡在河南督州縣開墾士俊承其後督促益加嚴又令州縣勸民間捐輸高宗即位戶部尚書史貽直奏言河南地勢平衍沃野千里民性純樸動於稼穡自來無土不耕其不耕者大都斥鹵沙磧之區臣聞河南各屬廣行開墾一縣中有報開十頃十數頃至數十頃者積算無慮數千百頃安得荒田如許之多推求其故不過督臣授意地方官多報開墾屬吏迎合指稱某處隙地若干某處曠土若干造冊申報督臣據其冊籍報多者超邊議敘報少者嚴批申飭或別尋事故挂之彈章地方官畏其權勢冀得歡心詎恤後日官民受累以致報墾者紛紛其實所報之地非河灘沙磧之區卽山岡犖确之地甚至墳墓之側河隄所在搜剔廢遺目下行之不過枉費民力其害猶小數年後按畝升科指斥鹵爲膏腴勘石田以上稅小民將有鬻兒賣女以應輸將者又如勸捐乃不得已之策今則郡縣官長驅車郭門手持簿籍不論鹽當紳民慰以好言令其登寫旋索資

鐵地方官一年數換則籍簿一年數更不惟大拂民心亦且有損國體請敕廉明公正大臣前往清察上諭曰田文鏡爲總督苛創嚴厲河南民重受其困士俊接任不能加惠養借墾地之虛名成累民之實害河南民風淳樸竭蹶以從甚屬可嘉然先後遭苛政其情亦至可愍矣河南仍如舊例止設巡撫以傳德代士俊士俊至京師命署兵部侍郎乾隆元年復命署四川巡撫士俊在河南上蔡知縣貴金馬奉檄開墾迫縣民加報地畝錢糧武生王作孚等詣縣辨訴貴金馬以衆衆閭閻揭士俊士俊諭定讞毋及開墾妄坐作孚等勒減鹽價擬斬傅德疏劾下部議士俊當奪官上命仍留任士俊密疏陳時政略言近日條陳惟在翻駁前案甚有對衆揚言只須將世宗時事翻案即係好條陳傳之天下甚駭聽聞又言大學士不宜兼部又言各部治事私揣某省督撫正在喪嘉其事宜准某省督撫方被詰責其事宜駁不論事理當否專以逢合爲心又言廷臣保舉率多徇情甚或藉以索賄上覽奏怒其發王大臣公閱御史舒赫德因劾士俊奸頑刻薄中外共知其爲河南總督勒令州縣虛報墾荒苦累小

民近日巡撫傅德論劾外間傳說士俊已命逮治皇上猶冀其改惡向善曲賜
矜全乃士俊喪心病狂妄發悖論請明正其罪上召王大臣九卿等諭之曰從
來爲政之道損益隨時寬猛互濟記曰張而不弛文武弗能弛而不張文武弗
爲堯因四岳之言而用鯀鯀治水九載績用弗成至舜而後殛鯀當日用鯀者
堯誅鯀者舜豈得謂舜翻堯案乎皇考卽位之初承聖祖深仁厚澤休養生息
物燾而豐皇考加意振飭使紀綱整齊此因勢利導之方正繼志述事之善迨
雍正九年以來人心已知法度吏治已漸澄清又未嘗不敦崇寬簡相安樂易
朕纘承丕緒泣奉遺詔向後政務應從寬者悉從寬凡川人行政兢兢焉以皇
考誠民育物之心爲心以皇考執兩用中之政爲政蓋皇祖皇考與朕之心初
無絲毫間別今王士俊嘗爲翻駁前案是誠何心朕躬有闕失惟恐諸臣不肯
盡言至事關皇考而妄指前愆謂有意更張實朕所不忍聞至謂大學士不宜
兼部大學士兼部正皇考成憲士俊欲朕改之是又導朕以翻案也彼不過爲
大學士鄂爾泰而發士俊河南墾荒市興利之善名行剝民之虐政使敗露於

皇考時豈能寬宥彼欲掩飾從前之罪且中傷與己不合之人其機詐不可勝詰至謂部件題馭挾私心保舉徇情貪緣賄屬諸臣有則痛自湔除無則益加黜勉毋爲士俊所訕笑以全朕委任簡用之體可也解士俊任逮下刑部王大臣等會鞫請用大不敬律擬斬立決命改監候二年釋爲民遣還里六年以爭佔甕安縣民羅氏墓地縱僕毆民民自經死民子走京師叩關命副都御史仲永檀如貴州會總督張廣泗鞫得實論罪如律二十一年卒

論曰世宗以綜覈名實督天下肅吏治嚴盜課實倉庫清通賦行勘丈墾荒土提耗羨此其大端也術文鏡受上眷最厚術以敏集事文鏡以驕府怨然當時謂術文鏡所部無盜賊斯亦甚難能矣勘丈激亂四川爲最著耗羨歸公山西爲最先田賦懸通江蘇爲最鉅開墾害民河南爲最劇世宗親決庶政不歸罪臣下故諸岷蒙褒而憲德不尸其咎時夏才短事未克竟亦不深責也士俊及高宗初政繼而猶用乃創翻案之說欲以英主聽筭朝議心險而術淺其得譴

宜哉